



晋書
三



リ伊8
1.735
65



1735
65



百書十一

志第一

天文上

天體 儀象 天文經星 二十八舍 州郡躔次
宿外星 天漢起沒 十二次度數

昔在庖犧觀象察法以通神明之德以類天地之情可以藏往知來開物成務故易曰天垂象見吉凶聖人象之此則觀乎天文以示變者也尚書曰天聰明自我民聰明此則觀乎人文以成化者也是故政教兆於人理祥變應乎天文得失雖微罔不昭著然則三皇邁德七曜順軌日月無薄蝕之變星辰靡錯亂之妖黃帝創受河圖始明休咎故其星傳尚有存焉降在高陽乃命南正重司天北正黎司地爰洎帝嚳亦式序三辰唐虞則羲和繼軌有夏則昆吾紹德年代綿邈文籍靡傳至于殷之巫咸周之史佚格言遺記于今不朽其諸侯之史則魯有梓慎晉有卜偃鄭有裨竈宋有

書局
所購以贈
州山田
月同
八
贈
一
八

氏
氏
氏

子韋齊有甘德楚有唐昧趙有尹臯魏有石申夫皆掌著天文各論圖驗其巫咸甘石之說後代所宗暴秦燔書六經殘滅天官星占存而不毀及漢景武之際司馬談父子繼爲史官著天官書以明天人之道其後中壘校尉劉向廣洪範災條作皇極論以參往之行事及班固叙漢史馬遷續述天文而蔡邕譙周各有撰錄司馬彪採之以繼前志今詳衆說以著于篇

天體

古言天者有三家一曰蓋天二曰宣夜三曰渾天漢靈帝時蔡邕于朔方上書言宣夜之學絕無師法周髀術數具存考驗天狀多所違失惟渾天近得其情今史官候臺所用銅儀則其法也立八尺貞體而具天地之形以正黃道占察發斂以行日月以步五緯精微深妙百代不易之道也官有其器而無本書前志亦闕蔡邕

所謂周髀者卽蓋天之說也其本庖犧氏立周天歷度其所傳則周公受於殷商周人志之故曰周髀髀股也股者表也其言天似蓋笠地法覆槃天地各中高外下北極之下爲天地之中其地最高而滂沲四隤三光隱映以爲晝夜天中高於外衡冬至日之所在六萬里北極下地高於外衡下地亦六萬里外衡高於北極下地二萬里天地隆高相從日去地恒八萬里日麗天而平轉分冬夏之間日前行道爲七衡六間每衡周經里數各依美術用句股重^{一作里}差推晷影極游以爲遠近之數皆得於表股者也故曰周髀又周髀家云天負如張蓋地方如碁局天旁轉如推磨而左行日月右行隨天左轉故日月實東行而天牽之以西沒譬之於蟻行磨石之上磨左旋而蟻右去磨疾而蟻遲故不得不隨磨以左迴焉天形南高而北下日出高故見日入下故不見天之居如倚蓋故

極在人北是其證也極在天之中而今在人北所以知天之形如倚蓋也日朝出陽中暮入陰中陰氣暗冥故沒不見也夏時陽氣多陰氣少陽氣光明與日同輝故日出即見無蔽之者故夏日長也冬天陰氣多陽氣少陰氣暗冥掩日之光雖出猶隱不見故冬日短也宣夜之書云惟漢秘書郎郗萌記先師相傳云天了無質仰而瞻之高遠無極眼瞽精絕故蒼蒼然也譬之旁望遠道之黃山而皆青俯察千仞之深谷而窈黑夫青非真色而黑非有體也日月衆星自然浮生虛空之中其行其止皆須氣焉是以七曜或逝或住或順或逆伏見無常進退不同由乎無所根繫故各異也故辰極常居其所而北斗不與衆星西一作同沒也攝提填星皆東行日行一度月行十三度遲疾任情其無所繫著可知矣若綴附天體不得爾也成帝咸康中會稽虞喜因宣夜之說作安天論以爲天高

窮於無窮地深測於不測天確乎在上有常安之形地魄焉在下有居靜之體當相覆冒方則俱方員則俱員無方員不同之義也其光曜布列各自運行猶江海之有潮汐一作液萬品之有行藏也葛洪聞而譏之曰苟辰宿不麗於天天爲無用便可言無何必復云有之而不動乎由此而談稚川可謂知言之選也虞喜族祖河間相聳又立穹天論云天形穹隆如雞子幕其際周接四海之表浮于元氣之上譬如覆奩以抑水而不沒者氣充其中故也日繞辰極沒西而還東不出入地中天之有極猶蓋之有斗也天北下於地三十度極之傾在地卯酉之北亦三十度人在卯酉之南十餘萬里故斗極之下不爲地中當對天地卯酉之位耳日行黃道繞極極北去黃道百一十五度南去黃道六十七度二至之所舍以爲長短也吳太常姚信造昕天論云人爲靈蟲形最似天今人頤

前多臨胸而項不能覆背近取諸身故知天之體南低入地北則偏高又冬至極低而天運近南故日去人遠而斗去人近北天氣至故冰寒也夏至極起而天運近北而斗去人遠日去人近南天氣至故蒸熱也極之立時日行地中淺故夜短天去地高故晝長也極之低時日行地中深故夜長天去地下淺故晝短也自虞喜虞聳姚信皆好奇狗異之說非極數談天者也至於渾天理妙學者多疑漢王仲任據蓋天之說以駁渾儀云舊說天轉從地下過今掘地一丈輒有水天何得從水中行乎甚不然也日隨天而轉非入地夫人目所望不過十里天地合矣實非合也遠使然耳今視日入非入也亦遠耳當日入西方之時其下之人亦將謂之爲中也四方之人各以其近者爲出遠者爲入矣何以明之今試使一人把火炬夜半一無半字行於平地去人十里火光滅矣非滅也遠使

然耳今日西轉不復見是火滅之類也日月不負也望視之所以負者去人遠也夫日火之精也月水之精也水火在地不負在天何故負故丹楊葛洪釋之曰渾天儀注云天如鷄子地如鷄中黃孤居於天內天大而地小天表裏有水天地各乘氣而立載水而行周天三百六十五度四分度之一又中分之則半覆地上半繞地下故二十八宿半見半隱天轉如車轂之運也諸論天者雖多然精於陰陽者張平子陸公紀之徒咸以爲推步七曜之道度歷象昏明之證候校以四八之氣考以漏刻之分占晷景之往來求形驗於事情莫密於渾象者也張平子旣作銅渾天儀於密室中以漏水轉之令伺之者閉戶而唱之其伺之者以告靈臺之觀天者曰璇璣所加某星始見某星已中某星今沒皆如合符也崔子玉爲其碑銘曰數術窮天地制作侔造化高才偉藝與神合契蓋

由于平子渾儀及地動儀之有驗故也若夫宋本果如渾者則天之出入行於水中爲的然矣故黃帝書曰天在地外水在天外水浮天而載地者也又易曰時乘六龍夫陽爻稱龍龍者居水之物以喻天天陽物也又出入水中與龍相似故以龍比也聖人仰觀俯察審其如此故晉卦坤下離上以證日出於地也又明夷之卦離下坤上以證日入於地也需卦乾下坎上此亦天入水中之象也天爲金金水相生之物也天出入水中當有何損而謂爲不可乎故桓君山曰春分日出卯入酉此乃人之卯酉天之卯酉常值斗極爲天中今視之乃在北不正在人上而春秋分時日出入乃在斗極之南若如磨右一作轉則北方道遠而南方道近晝夜漏刻之數不應等也後奏事待報坐西廊廡下以寒故暴背有頃日光出去不復暴背君山乃告信蓋天者曰天若如推磨右轉而日西行

者其光景當照此廊下稍而東耳不當拔出去拔出去是應渾天法也渾爲天之真形於是可知矣然則天出入水中無復疑矣又今視諸星出於東者初但去地小許耳漸而西行先經人上後遂西轉而下焉不旁旋也其先在西之星亦稍下而沒無北轉者日之出入亦然若謂天磨右轉者日之出入亦然衆星日月宜隨天而迴初在於東次經於南次到於西次及於北而復還於東不應橫過去也今日出於東冉冉轉上及其入西亦復漸漸稍下都不繞邊北去了了如此王生必固謂爲不然者疏矣今日徑千里圍周三千里中足以當小星之數十也若日以轉遠之故但當光曜不能復來照及人耳宜猶望見其體不應都失其所在也日光旣盛其體又大於星多矣今見極北之小星而不見日之在北者明其不北行也若日以轉遠之故不復可見其北入之間應當稍小

而日方入之時乃更大此非轉遠之徵也王生以火炬喻日吾亦將借子之矛以刺子之楯焉把火之去人轉遠其光轉微而日月自出至入不漸小也王生以火喻之謬矣又日之入西方視之稍去初尚有半如橫破鏡之狀須臾淪沒矣若如王生之言日轉北去有半者其北都沒之頃宜先如豎破鏡之狀不應如橫破鏡也如此言之日入西方不亦孤子乎又月之光微不及日遠矣月盛之時雖有重雲蔽之不見月體而夕猶朗然是光猶從雲中而照外也日若繞西及北者其光故應如月在雲中之狀不得夜便大暗也又日入則星月出焉明知天以日月分主晝夜相代而照也若日常出者不應日亦入而星月亦出也又按河洛之文皆云水火者陰陽之餘氣也夫言餘氣也則不能生日月可知也顧當言日陽精生火者可耳若水火是日月所生則亦何得盡如日月

之負乎今火出於陽燧陽燧負而火不負也水出於方諸方諸方而水不方也又陽燧可以取火於日而無取日於火之理此則日精之生火明矣方諸可以取水於月而無取月於水之理此則月精之生水了矣王生又云遠故視之負若審然者月初生之時及既虧之後何以視之不負乎而日食或上或下從側而起或如鈎至盡若遠視見負不宜見其殘缺左右所起也此則渾天之理一作體信而有徵矣

儀象

虞書曰在璇璣玉衡以齊七政考靈曜云分寸之晷代天氣生以制方負方負以成參以規矩昏明主時乃命中星觀玉儀之游鄭玄謂以玉爲渾儀也春秋文曜鉤云唐堯卽位羲和立渾儀此則儀象之設其來遠矣綿代相傳史官禁密學者不覩故宣蓋沸騰

暨漢太初落下閎鮮于妄人耿壽昌等造貞儀以考歷度後至和
帝時賈逵繫作又加黃道至順帝時張衡又制渾象具內外規南
北極黃赤道列二十四氣二十八宿中外星官及日月五緯以漏
水轉之于殿上室內星中出沒與天相應因其闕戾又轉瑞輪莖
莖於堦下隨月虛盈依歷開落其後陸績亦造渾象至吳時中常
侍廬江王蕃善數術傳劉洪乾象歷依其法而制渾儀立論考度
曰前儒舊說天地之體狀如鳥卵天包地外猶殼之裹黃也周旋
無端其形渾渾然故曰渾天也周天三百六十五度五百八十九
分度之百四十五半覆地上半在地下其二端謂之南極北極北
極出地三十六度南極入地三十六度兩極相去一百八十二度
半彊繞北極徑七十二度常見不隱謂之上規繞南極七十二度
常隱不見謂之下規赤道帶天之絃去兩極各九十一度少彊黃

道日之所行也半在赤道外半在赤道內與赤道東交於角五少
弱西交於奎十四少彊其赤道外極遠者去赤道二十四度斗二
十一度是也其入赤道內極遠者亦二十四度井二十五度是也
日南至在斗二十一度去極百一十五度少彊是也日最南去極
最遠故景最長黃道斗二十一度出辰入申故日亦出辰入申日
晝行地上百四十六度彊故日短夜行地下二百一十九度少弱
故夜長自南至之後日去極稍近故景稍短日晝行地上度稍多
故日稍長夜行地下度稍少故夜稍短日所在度稍北故日稍北
以至於夏至日在井二十五度去極六十七度少彊是日最北去
極最近景最短黃道井二十五度出寅入戌故日亦出寅入戌日
晝行地上二百一十九度少弱故日長夜行地下百四十六度彊
故夜短自夏至之後日去極稍遠故景稍長日晝行地上度稍少

故日稍短夜行地下度稍多故夜稍長日所在度稍南故日出入稍南以至於南至而復初焉斗二十一井二十五南北相應四十八度春分日在奎十四少彊秋分日在角五少弱此黃赤二道之交中也去極俱九十一度少彊南北處斗二十一井二十五之中故景居二至長短之中奎十四角五出卯入酉故日亦出卯入酉日晝行地上夜行地下俱百八十二度半彊故日見之漏五十刻不見之漏五十刻謂之晝夜同夫天之晝夜以日出沒爲分人之晝夜以昏明爲限日未出二刻半而明日入二刻半而昏故損夜五刻以益晝是以春秋分漏晝五十五刻三光之行不必有常術術家以筭求之各有同異故諸家歷法參差不齊洛書甄曜度春秋考異郵皆云周天一百七萬一千里一度爲二千九百三十二里七十一步二尺七寸四分四百八十七分分之三百六十二陸

績云天東西南北徑三十五萬七千里此言周三徑一也考之徑一不啻周三率周百四十二而徑四十五則天徑三十二萬九千四百一里一百二十二步二尺二寸一分七十一分分之十周禮日至之景尺有五寸謂之地中鄭衆說土圭之長尺有五寸以夏至之日立八尺之表其景與土圭等謂之地中今潁川陽城地也鄭玄云凡日景於地千里而差一寸景尺有五寸者南戴日下萬五千里也以此推之日當去其下地八萬里矣日邪射陽城則天徑之半也體圓如彈丸地處天之半而陽城爲中則日春秋冬夏昏明晝夜去陽城皆等無盈縮矣故知從日邪射陽城爲天徑之半也以句股法言之旁萬五千里句也立八極萬里股也從日邪射陽城弦也以句股求弦法入之得八萬一千三百九十四里三十步五尺三寸六分天徑之半而地上去天之歎也倍之得十六

萬二千七百八十八里六十一步四尺七寸二分天徑之數也以周率乘之徑率約之得五十一萬三千六百八十七里六十八步一尺八寸二分周天之數也減甄曜度考異郵五十五萬七千三百一十二里有奇一度凡千四百六里二十四步六寸四分十萬七千五百六十五分分之萬九千四十九減舊度千五百二十五里二百五十六步三尺三寸二十一萬五千一百三十分分之十六萬七百三十分黃赤二道相與交錯其間相去二十四度以南儀推之二道俱三百六十五度有奇是以知天體圓如彈丸也而陸績造渾象其形如鳥卵然則黃道應長於赤道矣績云天東西南北徑三十五萬七千里然則績亦以天形正負也而渾象爲鳥卵則爲自相違背古舊渾象以二分爲一度凡周七尺三寸半分張衡更制以四分爲一度凡周一丈四尺六寸蕃以古制局小星

辰稠穢衡器傷大難可轉移更制渾象以三分爲一度凡周天一丈九寸五分分之三也

天文經星

洪範傳曰清而明者天之體也天忽變色是謂易常天裂陽不足是謂臣彊天裂見人兵起國亡天鳴有聲至尊憂且驚皆亂國之所生也馬績云天文在圖籍昭昭可知者經星常宿中外官凡一百一十八名積數七百八十三皆有州國官宮物類之象張衡云文曜麗乎天其動者有七日月五星是也日者陽精之宗月者陰精之宗五星五行之精衆星列布體生於地精成於列列居錯峙各有攸屬在野象物在朝象官在人象神其以神差有五列焉是爲三十五名一居中央謂之北斗四布於方各七爲二十八舍日月運行歷示吉凶五緯躔次用告禍福中外之官常明者百有二

十四可名者三百二十為星二千五百微星之數蓋萬有宋本無一有字千五百二十庶物蠢蠢咸得繫命不然何得總而理諸後武帝時太史令陳卓總甘石巫咸三家所著星圖大凡二百八十三官一千四百六十四星以為定紀今略其昭昭者以備天官云中宮

北極五星鉤陳六星皆在紫宮中北極北辰最尊者也其紐星天之樞也天運無窮三光迭耀而極星不移故曰居其所而眾星拱之第一星主月太子也第二星主日帝王也亦太乙之坐謂最赤明者也第三星主五星庶子也中星不明主不用事右星不明太子憂鉤陳後宮也大帝之正妃也大帝之帝居也北四星曰女御宮八十一御妻之象也鉤陳口中一星曰天皇大帝其神曰耀魄寶主御羣靈執萬神圖抱北極四星曰四輔所以輔佐北極而出

度授政也大帝上九星曰華蓋所以覆蔽大帝之坐也蓋下九星曰杠蓋之柄也華蓋下五星曰五帝內坐設叙順帝所居也客星犯紫宮中坐大臣犯主華蓋杠旁六星曰六甲可以分陰陽而配節候故在帝旁所以布政教而授農時也極東一星曰柱下史主記過左右史此之象也柱史北一星曰女史婦人之微者主傳漏故漢有侍史傳舍九星在華蓋上近河賓客之館主胡人入中國客星守之備姦使亦曰胡兵起傳舍南河中五星曰造父御官也一曰司馬或曰伯樂星亡馬大貴其西河中九星如鉤狀曰鉤星直則地動天一星在紫宮門右星南天帝之神也主戰鬪知人吉凶者也太一星在天一南相近亦天帝神也主使十六神知風雨水旱兵革飢饉疾疫災害所在之國也紫宮垣十五星其西蕃七東蕃八在北斗北一曰紫微大帝之坐也天子之常居也主命主

度也一曰長垣一曰天營一曰旗星爲蕃衛備蕃臣也宮闕兵起
旌旗星直天子出自將宮中兵東垣下五星曰天柱建政教懸圖
法門內東南維五星曰尚書主納言夙夜諮謀龍作納言此之象
也尚書西二星曰陰德陽德主周急振撫宮門左星內二星曰大理
主平刑斷獄也門外六星曰天牀主寢舍解息燕休西南角外二
星曰內廚六宮之內飲食主后妃夫人與太子宴飲東北維外六
星曰天府主盛饌北斗七星在太微北七政之樞機陰陽之元本
也故運乎天中而臨制四方以建四時而均五行也魁四星爲璇
璣杓三星爲玉衡又曰斗爲人君之象號令之主也又爲帝車取
乎運動之義也又魁第一星曰天樞二曰璇三曰璣四曰權五曰
玉衡六曰開陽七曰搖光一至四爲魁五至七爲杓樞爲天璇爲
地璣爲人權爲時玉衡爲音開陽爲律搖光爲星石氏元第一曰

正星主陽德天子之象也二曰法星主陰刑女主之位也三曰令
星主中禍四曰伐星主天理伐無道五曰殺星主中央助四旁殺
有罪六曰危星主天倉五穀七曰部星亦曰應星主兵又一主天
二主地三主火四主水五主土六主木七主金又曰一主秦二主
楚三主梁四主吳五主燕六主趙七主齊魁中四星爲貴人之牢
曰天理也輔星傳乎開陽所以佐斗成功丞相之象也七政星明
其國昌輔星明則臣彊杓南三星及魁第一星西三星皆曰三公
主宣德化調七政和陰陽之官也

文昌六星在北斗魁前天之六府也主集計天道一曰上將大將
軍建威武二曰次將尚書正左右三曰貴相太常理文緒四曰司
祿司中司隸賞功進五曰司命司怪太史主滅咎六曰司寇大理
佐理寶所謂一者起北斗魁前近內階者也明潤大小齊天瑞臻

文昌北六星曰內階天皇之階也相一星在北斗南相者總領百司而掌邦教以佐帝王安邦國集衆事也其星明吉太陽守在相西大將大臣之象也主戒不虞設武備西北四星曰勢勢腐刑人也天牢六星在北斗魁下貴人之牢也太微天子庭也五帝之座也十二諸侯府也其外蕃九卿也一曰太微爲衡衡主平也又爲天庭理法平辭監升授德列宿受符諸神考節舒情稽疑也南蕃中二星間曰端門東曰左執法廷尉之象也西曰右執法御史大夫之象也執法所以舉刺凶姦者也左執法之東左掖門也右執法之西右掖門也東蕃四星南第一曰上相其北東太陽門也第二星曰次相其北中華東門也第三星曰次將其北東太陰門也第四星曰上將所謂四輔也西蕃四星南第一星曰上將其北西太陽門也第二星曰次將其北中華西門也第三星曰次相其北西

太陰門也第四星曰上相次亦曰四輔也東西蕃有芒及動搖者諸侯謀執法移刑罰尤急月五星入太微軌道吉其所犯中坐成刑其西南角外三星曰明堂天子布政之宮明堂西三星曰靈臺觀臺也主觀雲物察符瑞候災變也左執法東北一星曰謁者主贊賓客也謁者東北三星曰三公內坐朝會之所居也三公北三星曰九卿內坐治萬事九卿西五星曰內五諸侯內侍天子不之國也辟雍之禮得則太微諸侯明

黃帝坐在太微中含樞紐之神也天子動得天度止得地意從容中道則太微五帝坐明以光黃帝坐不明人主求賢士以輔法不然則奪勢四帝星俠黃帝坐東方蒼帝靈威仰之神也南方赤帝赤燁怒之神也西方白帝白招矩之神也北方黑帝叶光紀之神也五帝坐北一星曰太子帝儲也太子北一星曰從官侍臣也帝

坐東北一星曰幸臣屏四星在端門之內近右執法屏所以壅蔽
帝庭也執法主刺舉臣尊敬君上則星光明潤澤郎位十五星在
帝坐東北一曰依烏郎府也周官之元士漢官之光祿中散諫議
議郎三署郎中是其職也郎主守衛一作衛守也其星不具后妃死幸
臣誅星明大及客星入之大臣爲亂郎將在郎位北主閱具所以
爲武備也武賁一星在太微西蕃北下名南靜室旄頭之騎官也
常陳七星如畢狀在帝坐北天子宿衛武賁之士以設彊禦也星
搖動天子自出明則武兵用微則兵弱三台六星兩兩而居起文
昌列抵太微一曰天柱三公之位也在人曰三公在天曰三台主
開德宣符也西近文昌二星曰上台爲司命主壽次二星曰中台
爲司中主宗室東二星曰下台爲司祿主兵所以昭德塞違也又
曰三台爲天階太一躡以上下一曰泰階上階上星爲天子下星

爲女主中階上星爲諸侯三公下星爲卿大夫下階上星爲士下
星爲庶人所以和陰陽而理萬物也君臣和集如其常度有變則
占其人南四星曰內平近職執法平罪之官也中台之北一星曰
太尊貴戚也

攝提六星直斗杓之南主建時節伺機祥攝提爲楯以夾擁帝座
也主九卿明大三公忝客星入之聖人受制西三星曰周鼎主流
亡大角在攝提間大角者天王座也又爲天棟正經紀也北三星
曰帝席主宴獻酬酢北三星曰梗河天矛也一曰天鋒主胡兵又
爲喪故其變動應以兵喪也星亡其國有兵謀其北一星曰宋本無
招搖一曰矛楯其北一星曰玄戈皆主胡兵占與梗河略相類也
招搖與北斗杓間曰天庫星去其所則有庫開之祥也招搖欲與
棟星梗北斗相應則胡兵宋本無當來受命於中國玄戈又主北

夷客星守之胡大敗天槍三星在北斗杓東曰天鉞天之武備也
故在紫宮之左右所以禦難也女牀三星在紀星北後宮御也主
女事天棓五星在女牀北天子先驅也主分爭與刑罰藏兵亦所
以禦兵亦所以禦難也槍棓皆所宋本無所字以備非常也一星不具其
國兵起東七星曰扶筐盛桑之器主勸蠶也七公七星在招搖東
天之相也三公之象也主七政貫索九星在其前賤人之牢也一
曰連索一曰連營一曰天牢主法律禁暴彊也牢口一星爲門欲
其開也九星皆明天下獄煩七星見小赦六星五星大赦動則谷
鑽用中空則更元漢志云十五星天紀九星在貫索東九卿也主
萬事之紀理怨訟也明則天下多辭訟亡則政理壞國紀亂散絕
則地震山崩織女三星在天紀東端天女也主果蓏絲帛珍寶也
王者至孝神祇咸喜則織女星俱明天下和平大星怒角布帛貴

東足四星曰漸臺臨水之臺也主畧漏律呂之事西足五星曰輦
道王者嬉游之道也漢輦道通南北宮其象也左右角間二星曰
平道之官平道西一星曰進賢主卿相舉逸才亢東咸西咸各四
星在房心北日月五星之道也房之戶所以防佚淫也星明則信
吉月五星犯守之有陰謀鍵閉一星在房東北鉤鈴主關籥天市
垣二十二星在房心東北主權衡主聚衆一曰天旗庭主斬戮之
事也市中星衆潤澤則歲實熒惑守之戮不忠之臣彗星除之爲
徙市易都客星入之兵大起出之有貴喪帝坐一星在天市中星
西天庭也光而潤則天子吉威令行候一星在帝坐東北主伺陰
陽也明大輔臣彊四夷開候細微則國安亡則主失位移則不安
宦者四星在帝坐西南侍王刑餘之人也星微吉非其常宦者有
憂宗正二星在帝坐東南宗大夫也彗星守之若失色宗正有事

客星守之更號令也宗人四星在宗正東主錄親疎享祀族人有序則如綺文而明正動則天子親屬有變客星守之貴人死宗星二在候星東宗室之象帝輔血脉之臣也客星守之宗支不和天江四星在尾北主太陰江星不具天下津河關道不通明若動搖大水出大兵起參差則馬貴熒惑守之有立主客星入之河津絕天籥八星在南斗柄西主關閉建星六星在南斗北亦曰天旗天之都關也為謀事為天鼓為天馬南二星天庫也中央二星市也鈇鑽也上二星旗跗也斗建之間三光道也星動則眾勞月暈之蛟龍見牛馬疫月五星犯之大臣相譖有謀亦為關梁不通有大水東南四星曰狗國主鮮卑烏丸沃且熒惑守之外夷為變狗國北二星曰天雞主候時天辯九星在建星北市官之長也以知市珍也星欲明吉彗星犯守之糴貴囚徒起兵河鼓三星旗九星在

牽牛北天鼓也主軍鼓主鈇鉞一曰三武主天子三將軍中央大星為大將軍左星為左將軍右星為右將軍左星南星也所以備關梁而距難也設守阻險知謀徵也旗節天鼓之旗所以為旌表也左旗九星在鼓左旁鼓欲正直而明色黃光澤將吉不正為兵變宋元本也星怒馬貴動則兵起曲則將失計奪勢旗星差戾亂相陵旗端四星南北列曰天桴鼓桴也星不明漏刻失時前近河鼓若桴鼓相直皆為桴鼓用離珠五星在須女北須女之藏府女子之星也天津九星橫河中一曰天漢一曰天江主四瀆津梁所以度神通四方也一星不備津關道不通騰蛇二十二星在營室北天蛇也主水蟲王良五星在奎北居河中天子奉車御官也其四星曰天駟旁一星曰王良亦曰天馬其星動為策馬策車騎滿野亦曰梁為天橋主禦風雨水道故或占車騎或占津梁客星守之

橋不通道前一星曰策星王良之御策也主天子之僕在王良旁若移在王良前居馬後是謂策馬則車騎滿野閣道六星在王良前飛道也從紫宮至河神所乘也一曰閣道星天子游別宮之道也傳路一星在閣道南旁別道也東壁北十星曰天廐主馬之官若今驛亭也主傳令置驛逐漏馳騫謂其行急疾與夏漏競馳也天將軍十二星在婁主武兵中央大星天之天將也南一星曰軍南門主誰何出入太陵八星在胃北亦曰積京主大喪也積京中星衆則諸侯有喪民多疾兵起太陵中一星曰積尸明則死人如山北九星曰天船一曰舟星所以濟不通也中一星曰積水候水災昴西二星曰天街三光之道主伺候關梁中外之境卷舌六星在昴北主口語以知佞讒也曲吉直而動天下有口舌之害中一曰天讒主巫醫五車五星三柱九星在畢北五車者五帝車舍

也五帝坐也主天子五兵一曰主五穀豐耗西北大星曰天庫主太白主秦次東北星曰獄主辰星主燕趙次東星曰天倉主歲星主魯衛次東南星曰司空主填星主楚次西南星曰卿星主熒惑主魏五星有變皆以其所主宋本無主字占之三柱一曰三泉天子得靈臺之禮則五車三柱均明有常其中五星曰天潢天潢南二星曰咸池魚圉也月五星入天潢兵起道不通天下亂五車南六星曰諸王察諸侯存亡其西八星曰八穀主候歲八穀一星亡一穀不登天關一星在五車南亦曰天門日月之所行也主邊事主關閉芒角有兵五星守之貴人多死東井鉞前四星曰司怪主候天地日月星辰變異及鳥獸艸木之妖明主聞災修德保福也司怪西北九星曰坐旗君臣設位之表也坐旗西四星曰天高臺榭之高主遠望氣象天高西一星曰天河主察山林妖變南河北河各三

星夾東井一曰天高之關門也主關梁南河曰南戌一曰南宮一
曰陽門一曰越門一曰權星主火北河曰北戌一曰北宮一曰陰
門一曰胡門一曰衡星主水兩河戌間日月五星之常道也河戌
動搖中國兵起南河南三星曰闕丘主宮門外象魏也五諸侯五
星在東井北主刺舉戒不虞又曰理陰陽察得失亦曰主帝心一
曰帝師二曰帝友三曰三公四曰博士五曰太史此五者常爲帝
定疑議星明大潤澤則天下大治芒角則禍在中五諸侯南三星
曰天樽主盛饘粥以給貧餒積水一星在北河西北水河也所以
供酒食之正也積薪一星在積水東北供庖廚之正也水位也四
星在積薪東主水衡客星若水火守犯之百流溢軒轅十七星在
七星北軒轅黃帝之神黃龍之體也后妃之主士職也一曰東陵
一曰權星主雷雨之神南大星女主也次北一星夫人也屏也上

將也次北一星妃也次將也其次諸星皆次妃之屬也女主南小

星女御也左一星少民后宗也右一星大民太后宗也欲其色黃

小而明也軒轅右角南三星曰酒旗酒官之旗也主宴饗

宋本作饗宴飲

食五星守酒旗天下大醜有酒肉財物賜若爵宗室酒旗南三星

曰天相丞相之象也軒轅西四星曰燿燿者烽火之燿也邊亭之

警候燿北四星曰內平平罪之官明刑罰少微四星在太微西士

大夫之位也一名處士亦天子副主或曰博士官一曰主衛掖門

南第一星處士第二星議士第三星博士第四星大夫明大而黃

則賢士舉也月五星犯之處士女主憂宰相易南四星曰長垣主

界域及胡夷熒惑入之胡入中國太白入之九卿謀

二十八舍

東方角二星爲天關其間天門也其內天庭也故黃道經其中七

曜之所行也左角爲天田爲理主刑其南爲太陽道右角爲將主兵其北爲太陰道蓋天之三門猶房之四表其星明大王道太平賢者在朝動搖移徙王者行亢四星天子之內朝也揜攝天下奏事聽訟理獄錄功者也一曰疏廟主疾疫星明大輔納忠天下寧氏四星王者之宿宮后妃之府休解之房前二星適也後二星妾也後二星大則臣奉度房四星爲明堂天子布政之宮也亦四輔也下第一星上將也次次將也次次相也上星上相也南二星君位北二星夫人位又爲四表中間爲天衢爲天關黃道之所經也南間曰陽環其南曰太陽北間曰陰間其北曰太陰七曜由乎天衢則天下平和由陽道則早喪由陰道則水兵亦曰天駟爲天馬主車駕南星曰左驂次左服次右服次右驂亦曰天廐又主開閉爲畜藏之所由也房星明則王者明驂星大則兵起星離民流又

北二小星曰鉤鈐房之鈐鍵天之管籥王閉鍵天心也明而近房天下同心鉤鈐間有星及疎圻則地動河清心三星天王正位也中星曰明堂天子位爲大辰主天下之賞罰天下變動心星見祥星明大天下同前星爲太子後星爲庶子心星直則王失勢尾九星後宮之場妃后之府上第一星后也次三星夫人次星后嬪妾第三星傍一星名曰神宮解衣之內室尾亦爲九子星色欲均明大小相承則後宮有叙多子孫箕四星亦後宮妃后之府亦曰天津一曰天雞主八風凡日月宿在箕東壁翼軫者風起又主口舌主客蠻夷胡貊故蠻胡將動先表箕焉北方南斗六星天廟也丞相太宰之位主褒賢進士稟授爵祿又主兵一曰天機南二星魁天梁也中央二星天相也北二星天府庭也亦爲壽命之期也將有天子之一作行事占於斗斗星盛明王道平和爵祿行牽牛六星天

之關梁主犧牲事其北二星一曰卽路一曰聚火又曰上一星主
道路次二星主關梁次三星主南越搖動變色則占之星明大王
道昌關梁通須女四星天少府也須賤妾之稱婦職之卑者也主
布帛裁製嫁娶虛二星冢宰之官也主北方邑居廟堂祭祀祝禱
事又主死喪哭泣危三星主天府天市架屋餘同虛占墳墓四星
屬危之下主死喪哭泣爲墳墓也營室二星天子之宮也一曰玄
宮一曰清廟又爲軍糧之府及土功事星明國昌小不明祠祀鬼
神不享離宮六星天子之別宮主隱藏休息之所東壁二星主文
章天下圖書之秘府也星明王者興道術行國多君子星失色大
小不同王者好武經士不用圖書隱星動則有土功

西方奎十六星天之武庫也一曰天豕亦曰封豕主以兵禁暴又
主溝瀆西南大星所謂天豕目亦曰大將欲其明妻一作星爲天

獄主苑牧犧牲供給郊祀胃一作星天之廚藏主倉廩五穀府也
明則和平昴七星天之耳也主西方主獄事又爲旄頭胡星也昴
畢間爲天街天子出旄頭罕畢以前驅此其義也黃道之所經也
昴明則天下牢獄平昴六星皆明與大星等大水七星皆黃兵大
起一星亡爲兵喪搖動有大臣下獄及有白衣之會大而數盡動
若跳躍者胡兵大起畢八星主邊兵王弋獵其大星曰天高一曰
邊將主四夷之尉也星明大則遠夷來貢天下安失色則邊兵亂
附耳一星在畢下主聽得失伺僊邪察不祥星盛則中國微有盜
賊邊侯驚外國反移動佞讒行月入畢多雨觜觥三星爲三軍之
候行軍之藏府葆旅收斂萬物明則軍儲盈將得勢參十星一曰
參伐一曰大辰一曰天市一曰鈇鉞主斬刈又爲天獄主殺伐又
主權衡所以平理也又主邊城爲九譯故不欲其動也參白獸之

體其中三星橫列三將也東北曰左肩主左將西北曰右肩主右將東南曰左足主後將軍西南曰右足主偏將軍故黃帝占參應七將中央三小星曰伐天之都尉也主胡鮮卑戎狄之國故不欲明七將皆明大天下兵精也王道缺則芒角張伐星明與參等大臣皆謀兵起參星失色軍散敗參芒角動搖邊候有急兵起有斬伐之事參星移客伐主參左足入玉井中兵大起秦大水若有喪山石爲怪參星差戾王臣貳

南方東井八星天之南門黃道所經天之亭候主水衡事法令所取平也王者用法平則井星明而端列鉞一星附井之前主伺淫奢而斬之故不欲其明明與井齊則用鉞於大臣月宿井有風雨輿鬼五星天目也主視明察奸謀東北星主積馬東南星主積兵西南星主積布帛西北星主積金玉隨變占之中央星爲積尸主

死喪祠祀一曰鈇鑕主誅斬鬼星明大穀成不明百姓散鑽欲其

忽忽然

宋本無然字

不明明則兵起大臣誅柳八星天之廚宰也王尚食

和滋味又主雷雨七星七星一名天都主衣裳文繡又主急兵盜賊故星明王道昌闇則賢良不處天下空張六星主珍寶宗廟所用及衣服又主天廚飲食賞賚之事星明則王者行五禮得天之中翼二十二星天之樂府俳倡又主夷狄遠客負海之賓星明大禮樂興四夷賓動則蠻夷使來離徒則天子舉兵軫四星主冢宰輔臣也主車騎主載任有軍出入皆占於軫又主風主死喪軫星明則車駕備動則車駕用轄星傅軫兩傍主王侯左轄爲王者同姓右轄爲異姓星明兵大起遠軫凶轄舉南蠻侵長沙一星在軫之中主壽命明則主壽長子孫昌又曰車無轄國有憂轄一作軫就聚兵大起

星官在二十八宿之外者

庫樓十星六大星為庫南四星為樓在角南一曰天庫兵甲之府也旁十五星三三而聚者柱也中央四小星衡_{宋本作街}也主陳兵東北二星曰陽門主守隘塞也南門二星在庫樓南天之外門也主守兵平星二星在庫樓北平天下之法獄事廷尉之象也天門二星在平星北亢南七星曰折威主斬殺頓頑二星在折威東南主考囚情狀察詐偽也騎官二十七星在氏南若天子武賁王宿衛東端一星騎陣將軍騎將也南三星車騎之將也陣車三星在騎官東北革車也積卒十二星在房心南主為衛也他星守之近臣誅從官二星在積卒西北龜五星在尾南主占以吉凶傳說一星在尾後傳說主章祝巫官也魚一星在尾後河中主陰事知雲雨之期也杵三星在箕南杵給庖春客星入杵曰天下有急糠星在箕舌

前杵西北鼈十四星在南斗南鼈為水蟲歸太陰有星守之白衣

會主有水令農丈人一星在南斗西南老農王穡也狗二星在南

斗魁前主吠守天田九星在牛南羅堰九星在牽牛東距馬也以

壅蓄水潦_{宋本潦字下多一灌字}溉渠也九坎九星在牽牛南坎溝渠也所以

導達泉源疏盈瀉溢通溝洫也九坎間十星曰天池一曰三池一

曰天海主灌溉田疇事虛南二星曰哭哭東二星曰泣泣哭皆近

墳墓泣南十三星曰天壘城如貫索狀主北夷丁零匈奴南二星

曰蓋屋治宮室之官也其南四星曰虛梁園陵寢廟之所也羽林

四十五星在營室南一曰天軍主軍騎又主翼王也壘壁陣十二

星在羽林北羽林之垣壘也主軍衛為營壘也五星有在天軍中

者皆為兵起熒惑太白辰星尤甚北落師門一星在羽林西南北

者宿在北方也落天之藩落也師眾也師門猶軍門也長安城北

門曰北落門以象此也主非常以候兵有星守之虜入塞中兵起其西北有十星曰天錢北落西南一星曰天綱主武帳北落東南九星曰八魁主張禽獸天倉六星在婁南倉穀所藏也南四星曰天庾積廚粟之所也天囷十三星在胃南囷倉廩之屬也主給御糧也天廩四星在昴南一曰天層主蓄黍稷以供饗祀春秋所謂御廩此之謂也宋本作象天苑十六星昴畢南天子之苑囿養獸之所也苑南十三星曰天園植果菜之所也畢附耳南八星曰天節主使臣之所持者也天節下九星曰九州殊口曉方俗之官通重譯者也參旗九星在參西一曰天旗一曰天弓主司弓弩之張候變禦難玉井四星在參左足下主水漿以給廚西南九星曰九游天子之旗也玉井東南四星曰軍井行軍之井也軍井未達將不言渴名取此也軍市十三星在參東南天軍貿易之市使有無通也野

雞一星主變怪在軍市中軍市西南二星曰丈人丈人東二星曰子子東二星曰孫東井西南四星曰水府主水之官也東井南垣之東四星四濱江河淮濟之精也狼一星在東井東南狼爲野將主侵掠色有常不欲動也北七星曰天狗主守財弧九星在狼東南天弓也主備盜賊當向於狼弧矢動移不如常者多盜賊胡兵大起狼弧張害及胡天下乖亂又曰天弓張天下盡兵弧南六星爲天社昔共工氏之子句龍能平水土故祀以配社其精爲星老人一星在弧南一曰南極常以秋分之旦見于景春分之夕而没于丁見則治平主壽昌常以秋分候之南郊柳南六星曰外廚廚南一星曰天紀主禽獸之齒稷五星在七星南稷農正也取平百穀之長以爲號也張南十四星曰天廟天子之祖廟也客星守之祠官有憂冀南五星曰東區蠻夷星也軫南三十二星曰器府樂

器之府也青丘七星在軫東南蠻夷之國號也青丘西四星曰土司空主界域亦曰司徒土司空北二星曰軍門主營候彪尾威旗天漢起沒

天漢起東方經尾箕之間謂之漢津乃分為二道其南經傳說魚天籥天弁河鼓其北經龜貫箕下次絡南斗魁左旗至天津下而合南道乃西南行又分夾瓠瓜絡人星杵造父騰蛇王良傳路閣道北端太陵天船卷舌而南行絡五車經北河之南入東井水位而東南行絡南河闕丘天狗天紀天稷在七星南而沒

十二次度數

十二次班固取三統歷十二次配十二野其言最詳又有費直說周易蔡邕月令章句所言頗有先後魏太史令陳卓更言郡國所入宿度今附而次之

自軫十二度至氐四度為壽星於辰在辰鄭之分野屬兗州費直周易

分野壽星起軫七度蔡邕月令章句壽星起軫六度

自氐五度至尾九度為大火於辰在卯宋之分野屬豫州費直起氐十一

度蔡邕起亢八度

自尾十度至南斗十一度為析木於辰在寅燕之分野屬幽州費直起尾九度蔡邕起尾四度

起尾九度蔡邕起尾四度

自南斗十二度至須女七度為星紀於辰在丑吳越之分野屬揚

州費直起斗十度蔡邕起斗六度

自須女八度至危十五度為玄枵於辰在子齊之分野屬青州費直起女六度蔡邕起女二度

起女六度蔡邕起女二度

自危十六度至奎四度為訛訾於辰在亥衛之分野屬并州費直起危十度

十四度蔡邕起危十度

自奎五度至胃六度為降婁於辰在戌魯之分野屬徐州費直起奎二度

蔡邕起奎八度

自胃七度至畢十一度為大梁於辰在酉趙之分野屬冀州費直起婁

十度蔡邕起胃一度

自畢十二度至東井十五度為實沈於辰在申魏之分野屬益州

費直起畢九度蔡邕起畢六度

自東井十六度至柳八度為鶉首於辰在未秦之分野屬雍州費直

起井十二度蔡邕起井十度

自柳九度至張十六度為鶉火於辰在午周之分野屬三河費直起柳

五度蔡邕起柳三度

自張十七度至軫十一度為鶉尾於辰在巳楚之分野屬荊州費直

起張十三度蔡邕起張十二度

州郡躔次

陳卓范蠡鬼谷先生張良諸葛亮譙周京房張衡並云

角亢氏鄭兗州

東郡入角一度 東平任城山陰入角六度

泰山入角十二度 濟北陳留入亢五度

濟陰入氏二度 東平入氏七度

房心宋豫州

潁川入房一度 汝南入房二度

沛郡入房四度 梁國入房五度

淮陽入心一度 魯國入心三度

楚國入房四度

尾箕燕幽州

涼州入箕中十度

上谷入尾一度

漁陽入尾三度

右北平入尾七度

西河上郡北地遼西東入尾十度

涿郡入尾十六度

渤海入箕一度

樂浪入箕三度

玄菟入箕六度

廣陽入箕九度

斗牽牛須女吳越揚州

九江入斗一度

廬江入斗六度

豫章入斗十度

丹楊入斗十六度

會稽入牛一度

臨淮入牛四度

廣陵入牛八度

泗水入女一度

六安入女六度

虛危齊青州

齊國入虛六度

北海入虛九度

濟南入危九度

樂安入危四度

東萊入危九度

平原入危十一度

菑川入危十四度

營室東壁衛并州

安定入營室一度

天水入營室八度

隴西入營室四度

酒泉入營室十一度

張掖入營室十二度

武都入東壁一度

金城入東壁四度

武威入東壁六度

敦煌入東壁八度

奎婁胃魯徐州

東海入奎一度

瑯琊入奎六度

高密入婁一度

城陽入婁九度

膠東入婁一度

昂畢趙冀州

魏郡入昂一度

鉅鹿入昂三度

常山入昂五度

廣平入昂七度

中山入昂一度

清河入昂九度

信畢入昂三度

趙郡入畢八度

安平入畢四度

河間入畢十度

真安入畢十三度

冀參魏益州

廣漢入冀一度

越雋入冀三度

蜀郡入參一度

犍為入參三度

犍犍入參五度

巴郡入參八度

漢中入參九度

益州入參七度

東井輿鬼秦雍州

雲中入東井一度

定襄入東井八度

鴈門入東井十六度

代郡入東井二十八度

太原入東井二十九度

上黨入輿鬼二度

柳七星張周三輔

弘農入柳一度

河南入七星三度

河東入張一度

河內入張九度

翼軫楚荊州

南陽入翼六度

南郡入翼十度

江夏入翼十二度
零陵入軫十一度
甘陽入軫六度
武陵入軫十度
長沙入軫十六度

晉書十一 志第一 終

魏川中鳳臺
氏康宿南甫

晉書十二

魏川中鳳臺
氏康宿南甫

志第二

天文 七曜 雜星氣 客星 流星 雲氣 十輝
七曜 雜氣 史傳事驗

日為太陽之精主生養恩德人君之象也人君有瑕必露其慝以
告示焉故日月行有道之國則光明人君吉昌百姓安寧人君乘
土而王其政太平則日五色無主日變色有軍軍破無軍喪侯王
其君無德其臣亂國則日赤無光日失色所臨之國不昌日晝昏
行人無影到暮不止者上刑急下不聊生不出一年有大水日晝
昏烏鳥群鳴國失政日中烏見主不明為政亂國有白衣會將軍
出旌旗舉日中有黑子黑氣黑雲乍三年五臣廢其主日蝕陰侵
陽臣掩君之象有亡國

月爲太陰之精以之配日女主之象以之比德刑罰之義列之朝廷諸侯大臣之類故君明則月行依度臣執權則月行失道大臣用事兵刑失理則月行乍南乍北女主外戚擅權則或進或退月變色將有殃月晝明姦邪並作君臣爭明女主失行陰國兵強中國饑天下謀僭數月重見國以亂亡

歲星曰東方春木於人五常仁也五事貌也仁虧貌失逆春令傷木氣則罰見歲星歲星盈縮以其舍命國其所居久其國有德厚五穀豐昌不可伐其對爲衝歲乃有殃歲星安靜中度吉盈縮失次其國有憂不可舉事用兵又曰人主之象也色欲明光色潤澤德合同又曰進退如度姦邪息變色亂行主無福又主福主大司農主齊吳主司天下諸侯人君之過主歲五穀赤而角其國昌赤黃而沉其野大穰

熒惑曰南方夏火禮也視也禮虧視失逆夏令傷火氣罰見熒惑熒惑法使行無常出則有兵入則兵散以舍命國爲亂爲賊爲疾爲喪爲饑爲兵所居國受殃環繞鉤已芒角動搖變色乍前乍後乍左乍右其爲殃愈甚其南丈夫北女子喪周旋止息乃爲歿喪寇亂其野亾地其失行而速兵聚其下順之戰勝又曰熒惑主大鴻臚主歿喪主司空又爲司馬主楚吳越以南又司天下群臣之過司驕奢亡亂妖孽主歲成敗又曰熒惑不動兵不戰有誅將其出色赤怒逆行成鉤已戰凶有圍軍鉤已有芒角如鋒刃人主無出宮下有伏兵亾大則人衆怒又爲理外則理兵內則理政爲天子之理也故曰雖有明天子必視熒惑所在其入守犯太微軒轅營室房心主命惡之

填星曰中央季夏土信也思心也仁義禮智以信爲主貌言視聽

以心爲正故四星皆失填乃爲之動動而盈侯王不寧縮有軍不復所居之宿國吉得地及女子有福不可伐去之失地若有女憂居宿久國福厚易則薄失次而上二三宿曰盈有王命不成不乃水火失次而下曰縮后戚其歲不復不乃天裂若地動一曰填爲黃帝之德女主之象主德厚安危存亡之機司天下女主之過又曰天子之星也天子失信則填星大動

太白曰西方秋金義也言也義虧言失逆秋令傷金氣罰見太白太白進退以候兵高埤遲速靜躁見伏用兵皆象之吉其出西方失行夷狄敗出東方失行中國敗未盡期曰過參天病其對國若經天天下革民更王是謂亂紀人衆流亡晝見與日爭明強國弱小國強女王昌又曰太白金大臣其號上公也大司馬位謹候此辰星曰北方冬水智也聽也智虧聽失逆冬令傷水氣罰見辰星

辰星見則主刑主廷尉主燕趙又爲燕趙代以比宰相之象亦爲殺伐之氣戰鬪之象又曰軍於野辰星爲偏將之象無軍爲刑事和陰陽應效不效其時不和出失其時寒暑失其節邦當大飢當出不出是謂擊卒兵大起在於房心間地動亦曰辰星出入躁疾常主夷狄又曰蠻夷之星也亦主刑法之得失色黃而小地大動光明與月相逮其國大水

凡五星有色大小不同各依其行而順時應節色變有類凡青皆比參左肩赤比心大星黃比參右肩白比狼星黑北奎大星不失本色而應其四時者吉色害其行凶

凡五星所出所行所直之辰其國爲得位得位者歲星以德熒惑有禮填星有福太白兵強辰星陰陽和所行所直之辰順其色而有角者勝其色害者敗居實有德也居虛無德也色勝位行勝色

行得盡勝之營室為清廟歲星廟也心為明堂熒惑廟也南斗為文太室填星廟也亢為疏廟太白廟也七星為貞宮辰星廟也五星行至其廟謹候其命

凡五星盈縮失位其精降于地為人歲星降為貴臣熒惑降為童兒歌謠嬉戲填星降為老人婦女太白降為壯夫處於林麓盧谷反辰星降為婦人吉凶之應隨其眾告

凡五星木與土合為內亂飢與水合為變謀而更事與火合為飢為旱與金合為白衣之會合鬪國有內亂野有破軍為水太白在南歲星在北名曰牝牡年穀大熟太白在北歲星在南年或有或無火與金合宋本合字下多一為字爍為喪不可舉事用兵從軍為軍憂離之軍却出太白陰分宅出其陽偏將戰與土合為憂王孽卿與水合為北軍用兵舉事大敗一曰火與水合曰一作焮取內反不可舉事

用兵土與水合為壅沮不可舉事用兵有覆軍下師一曰為變謀更事必為旱與金合為疾為白衣會為內兵國亡地與木合國飢水與金合為變謀為兵憂入太白中而上出破軍殺將客勝下出客亡地視旗所指以命破軍環繞太白若與鬪大戰客勝凡木火土金與水鬪皆為戰兵不在外皆為內亂凡同舍為合相陵為鬪二星相近其殃大相遠毋傷七寸以內必之

凡月蝕五星其國皆亡歲以飢熒惑以亂填以殺太白以強國戰辰以女亂

凡五星入月歲其野有逐相太白將僂

凡五星所聚其國王天下從歲以義從熒惑以禮從填以重從太白以兵從辰以法從各以其事致天下也三星若合是謂驚立一作兵絕行其國外內有兵與喪百姓飢乏改立侯王四星若合是謂太

陽其國兵喪並起君子憂小人流五星若合是謂易行有德承慶
改立王者掩有四方子孫蕃昌亡德受殃離其國家滅其宗廟百
姓離去被滿四方五星皆大其事亦大皆小事亦小

凡五星色皆圜白為喪為旱赤中不平為兵青為憂為水黑為疾
疫為多死黃為吉皆角赤犯我城黃地之爭白哭泣聲青有兵憂
黑有水五星同色天下偃兵百姓安寧歌舞以行不見災疾五穀
蕃昌

凡五星歲政緩則不行急則過分逆則占熒惑緩則不出急則不
入違道則占填緩則不還行在急則過舍逆則占太白緩則不出急
則不入逆則占辰緩則不出急則不入非時則占五星不先行則
年穀豐昌

凡五星分天之中積于東方中國利積于西方外國用兵者利辰

星不出太白為客其出太白為主出而與太白不相從及各出一
方為格野雖有軍不戰

凡五星見伏留行逆順遲速應歷度者為得其行政合于常違歷
錯度而失路盈縮者為亂行亂行則為天矢彗孛而有亡國革政
兵飢喪亂之禍云

雜星氣

圖緯舊說及漢末劉表為荊州牧命武陵太守劉叡集天文眾占
名荊州占其雜星之體有瑞星有妖星有客星有流星有瑞氣有
妖氣有日月傍氣皆略其名狀舉其占驗次之於此云

瑞星一曰景星如半月生於晦朔助月為明或曰星大而中空或
曰有三星在赤方氣與青方氣相連黃星在赤方氣中亦名德星
二曰周伯星黃色煌煌然所見之國大昌三曰含譽光耀似彗喜

則舍譽射四曰格澤如炎火下大上銳色黃白起地而上見則不種而穫有土功有大客

妖星一曰彗星所謂掃星本類星末類彗小者數寸長或竟天見則兵起大水主婦除除舊布新有五色各依五行本精所主史臣按彗體無光傳日而為光故夕見則東指晨見則西指在日南北皆隨日光而指頓挫其芒或長或短光芒所及則為災二曰孛星彗之屬也偏指曰彗芒氣四出曰孛孛者孛孛然非常惡氣之所生也內不有大亂則外有大兵天下合謀闇蔽不明有所傷害晏子曰君若不政孛星將出彗星何懼乎由是言之災甚於彗三曰天棊一名覺星本類星末銳長四丈或出東北方西方主奮爭四曰天槍其出不過三月必有破國亂君伏死其辜殃之不盡當為旱飢暴疾五曰天欖石氏曰雲如牛狀甘氏本類星末銳巫咸曰

彗星出西方長可二三丈主捕制六曰蚩尤旗類彗而後曲象旗或曰赤雲獨見或曰其色黃上白下或曰若植葆而長名曰蚩尤之旗或曰如箕可長二丈末有星主伐枉逆主惑亂所見之方下有兵兵大起不然有喪也宋本無也字七曰天衝出如人蒼衣赤頭不動見則臣謀主武卒發天子亡八曰國皇大而赤類南極老人星或曰去地三丈如炬火主內寇內難或曰其下起兵兵強或曰外內有兵喪九曰昭明象如太白光芒不行或曰大而白無角乍上乍下一曰赤彗分為昭明昭明滅光以為起霸起德之徵所起國兵多變一曰大人凶兵大起十曰司危如太白有目或曰出正西西方之野星去地可一作有六丈大而白或曰大而毛兩角或曰類太白血動察之而赤為乖爭之徵主擊強兵見則主失法豪傑起天子以不義失國有聲之臣行至德十一曰天讒彗出西北狀如劍長

四五丈或曰如鉤長四丈或曰狀白小數動主殺罰出則其國內亂其下相讒爲飢兵赤地千里枯骨藉藉十二曰五殘一名五鏗出正東東方星之狀類辰可去地六七丈或曰蒼彗散爲一作五殘如辰星出角或曰星表有氣如暈有毛或曰大而赤數動察之而青主乖亡爲五分毀敗之徵亦爲備急兵見則主誅政在伯野亂成有急兵有喪不利衝十三曰六賊見出正南南方之星去地可六丈大而赤動有光或曰形如彗五殘六賊出禍合天下逆侵關樞其下有兵衝不利十四曰獄漢一名咸漢出正北北方之野星去地可六丈大而赤數動察之中青或曰赤表下有彗從橫王逐王主刺王出則陰精橫兵起其下又爲喪動則諸侯驚十五曰旬始出北斗旁如雄雞其怒有青黑象伏龍或曰怒雌也王爭兵又曰黃彗分爲旬始爲立王之題王亂王招橫見則臣亂兵作諸

侯虐期十年聖人起伐群猾橫恣或曰出則諸侯雄鳴十六曰天鋒彗象矛鋒天下從橫則天鋒星見十七曰燭星如太白其出也不行見則不久而滅或曰主星上有彗上出所出城邑亂有大盜不成又以五色占十八曰蓬星大如二斗器色白一名王星狀如夜火之光多至四五少一二一曰蓬星在西南長數丈左右兌出而易處星見不出三年有亂臣戮死又曰所出大水大旱五穀不收人相食十九曰長庚如一疋布著天見則兵起二十曰四填星出四隅去地六丈餘或曰可四丈或曰星大而赤去地二丈常以夜半時出見十月而兵起皆爲兵起其下二十一曰地維藏光出四隅或曰大而赤去地二三丈如月始出見則下有亂亂者亡有德者昌

河圖云歲星之精流爲天棊 天槍 天猾 天衝 國皇

及登 蒼彗

熒惑散為昭旦 蚩尤之旗 昭明 司司危 天欖 赤彗

填星散為五殘 獄漢 大賁 昭星 紉流 旬始 蚩尤

虹蜺 擊咎 黃彗

太白散為天杵 天榭 伏靈 大敗 司姦 天狗 天殘

卒起 白彗

辰星散為枉矢 破女 拂樞 滅寶 繞縊 驚理 大奮祀

黑彗

五色之彗各有長短曲折應象

漢京房著風角書有集星章所載妖星皆見於月旁互有五色方雲以五寅日見各有五星所生云

天槍 天根 天荆 真若 天掖 天樓 天垣

皆歲星所生也見以甲寅其星咸有兩青方在其旁

天陰 晉若 官張 天惑 天崔 赤若 蚩尤

皆熒惑之所生也出在景寅日有兩赤方在其旁

天上 天伐 從星 天樞 天翟 天沸 荆彗

皆填星所生也出在戊寅日有兩黃方在其旁

若星 帝星 若彗 竹彗 墻星 掖星 白藿

皆太白之所生也出在庚寅日有兩白方在其旁

天美 天冕 天社 天麻 天林 天蒿 端下

皆辰星之所生也出以壬寅日有兩黑方在其旁

巳前三十五星即五行氣所生皆出於月左右方氣之中各以其所生星將出不出日數期候之當其未出之前而見見則有水旱兵喪飢亂所指亾國失地王歿破軍殺將

客星

張衡曰老子四星及周伯王蓬絮芮各一錯乎五緯之間其見無期其行無度荆州占云老子星色淳白然所見之國爲飢爲凶爲善爲惡爲喜爲怒周伯星黃色煌煌所至之國大昌蓬絮星色青而熒熒然所至之國風雨不節焦旱物不生五穀不登多蝗蟲又云東南有三星出名曰盜星出則天下有大盜西南有三大星出名曰種陵出則天下穀貴十倍西北三大星出而白名天狗出則人相食大凶東北有三大星出名曰女帛見則有大喪

流星

流星天使也自上而降曰流自下而升曰飛大者曰奔奔亦流星也星大者使大星小者使小聲隆隆者怒之象也行疾者期速行遲者期遲大而無光者衆人之事小而有光者貴人之事大而光

者其人貴且衆也乍明乍滅者賊敗成也前大後小者恐憂也前小後大者喜事也蛇行者姦事也往疾者往而不反也長者其事長久也短者事疾也奔星所墜其下有兵無風雲有流星見良久間乃入爲大風發屋折木小流星百數四面行者衆庶流移之象流星之類有音如炬火下地野雉鳴天保也所墜國安有喜若小流星色青赤名曰地鴈其所墜者起兵流星有光青赤長二三丈名曰天鴈軍中之精華也其國起兵將軍當從星所之流星暉然有光光白長竟天者人主之星也主相將軍從星所之飛星大如缶若甕後皎然白前卑後高此謂頓頑其所從者多死亡飛星大如缶若甕後皎然白星滅後白者曲環如車輪此謂解銜其國人相斬爲爵祿飛星大如缶若甕其後皎然白長數丈星滅後白者化爲雲流下名曰大滑所下有流血積骨

枉矢類流星色蒼黑蛇行望之如有毛目長數匹著天主反萌主射愚見則謀反之兵合射所誅亦爲以亂伐亂

天狗狀如犬奔星色黃有聲其止地類狗所墜望之如火光炎炎衝天其上銳其下負如數頃田處或曰星有毛旁有短彗下有狗形者或曰星出其狀赤白有光下卽爲天狗一曰流星有光見人面墜無音若有足者名曰天狗其色白其中黃黃如遺火狀主候兵討賊見則四方相射千里破軍殺將或曰五將鬪人相食所往之鄉有流血其君失地兵大起國易政戒守禦營頭有雲如壞山墮所謂營頭之星所墮其下覆軍流血千里亦曰流星晝墮名營頭

雲氣

瑞氣一曰慶雲若煙非煙若雲非雲郁郁紛紛蕭索輪囷是謂慶

雲亦曰景雲此喜氣也太平之應二曰歸邪如星非星如雲非雲或曰星有兩赤彗上向有蓋下連星見必有歸國者三曰昌光赤如龍狀聖人起帝受終則見

妖氣一曰虹蜺日旁氣也斗之亂精生惑心主內淫主臣謀君天子訕后妃頹妻不一二曰祥雲如狗赤色長尾爲亂君爲兵喪十輝

周禮眡稜氏掌十輝之法以觀妖祥辯吉凶一曰稜謂陰陽五色之氣浸淫相侵或曰抱珥背璫之屬如虹而短是也二曰象謂雲氣成形象如赤烏夾日以飛之類是也三曰鑄日傍氣刺日形如童子所佩之鑄四曰監謂雲氣臨在日上也五曰闇謂日月蝕或曰脫光宋本作光脫也六曰瞢謂瞢瞢不光明也七曰彌謂白虹彌天而貫日也八曰序謂氣若山而在日上或曰冠珥背璫重疊次序在

于日旁也九曰齊謂暈氣也或曰虹也詩所謂朝濟于西者也十
曰想謂氣五色有形想也青飢赤兵白喪黑憂黃熟或曰想思也
赤氣為人狩之形可思而知其吉凶也

凡遊氣蔽天日月失色皆是風雨之候也沉陰日月俱無光晝不
見日夜不見星有雲障之兩敵相當陰相圖議也日濛濛無光士
卒內亂又曰數日俱出若闔天下兵起大戰日闔下有拔城日戴
者形如直狀其上微起在日上為戴戴者德也國有喜也一云立
日上為戴青赤氣抱在日上小者為冠國有喜事青赤氣小而交
於日下為纓青赤氣小而負一二在日下左右宋本無左
右二字者為紐青
赤氣如小半暈狀在日上為負負者得地為喜又曰青赤氣長而
斜倚日旁為戟青赤氣負而小在日左右為珥黃白者有喜又曰
有軍日有一珥為喜在日西西軍戰勝在日東東軍戰勝南北亦

如之無軍而珥為拜將又日旁如半環向日為抱青赤氣如月初
生背日者為背又曰背氣青赤而曲外向為叛象分為反城璫者
如帶璫在日四方青赤氣長而立旁為值日旁有一直敵在一旁
欲自立從直所擊者勝日旁有二直三抱欲自立者不成順抱擊
者勝殺將氣形三角在日四方為提青赤氣橫在日上下為格氣
如半暈在日下為承承者臣承君也又曰日下有黃氣三重若抱
名曰承福人主有吉喜且得地青白氣如履在日下者為履日旁
抱五重戰順抱者勝日一抱一背為破走抱者順氣也背者逆氣
也兩軍相當順抱擊逆者勝故曰破走日抱且兩珥一虹貫抱抱
至日順虹擊者勝殺將日抱兩珥且璫二虹貫抱至日順虹擊者
勝日重抱內有璫順抱抱擊者勝亦曰軍內有欲反者日重抱左右
二珥有白虹貫抱抱擊勝得二將有三虹得三將日抱黃白潤

澤內赤外青天子有喜有和親來降者軍不戰敵降軍罷色青黃
將喜赤將兵爭白將有喪黑將死日重抱且背順抱擊者勝得地
若有罷師日重抱抱內外有璠兩珥順抱擊者勝破軍軍中不和
不相信日旁有氣負而周匝內赤外青名爲暈日暈者軍營之象
周環匝日無厚薄敵與軍勢齊等若無軍在外天子失御民多叛
日暈有五色有喜不得五色者有憂
凡占兩軍相當必謹審日月暈氣知其所起留止遠近應與不應
疾遲大小厚薄長短抱背爲多少有無虛實久亟密疎澤枯相應
等者勢等近勝遠疾勝遲大勝小厚勝薄長勝短抱勝背多勝少
有勝無實勝虛久勝亟密勝疎澤勝枯重背大破重抱爲和親抱
多親者益多背爲天下不和分離相去背於內者離於內背於外
者離於外也

雜氣

天子氣內赤外黃四方所發之處當有王者若天子欲有遊往處
其地亦先發此氣或如城門隱隱在氣霧中恒帶殺氣森森然或
如華蓋在氣霧中或氣象青衣人無手在日西或如龍馬或雜色
鬱鬱衝天者此皆帝王氣

猛將之氣如龍如猛獸或如火煙之狀或白如粉沸或如火光之
狀夜照人或白而赤氣繞之或如山林竹木或紫黑如門上樓或
上黑下赤狀似黑旌或如張弩或如埃塵頭銳而卑本大而高此
皆猛將之氣也氣發漸漸如雲變作山形將有深謀

凡軍勝之氣如堤如坂前後磨地或如火光將軍勇士卒猛或如
山堤山上若林木將士驍勇或如埃塵粉沸其色黃白或如人持
斧向敵或如蛇舉首向敵或氣如覆舟雲如牽牛或有雲如鬪雞

赤白相隨在氣中或發黃氣皆將士精勇

凡氣上黃下白名曰善氣所臨之軍敵欲求和退

凡負氣如馬肝色或如死灰色或類偃蓋或類偃魚或黑氣如壞山墜軍上者名曰營頭之氣或如羣羊羣猪在氣中此衰氣也或如懸衣如人相隨或紛紛如轉蓬或如揚灰或雲如卷席如匹布亂穰皆為敗徵氣如繫牛如人卧如雙蛇如飛鳥如決隄垣如壞屋如驚鹿相逐如兩雞相向此皆為敗軍之氣

凡降人氣如人十十五五皆叉手低頭又云如人叉手相向或氣如黑山以黃為緣者皆欲降伏之象也

凡堅城之上有黑雲如屋名曰軍精或白氣如旌旗或青雲黃雲臨城皆有大喜慶或氣青色如牛頭觸人或城上氣如煙火如雙蛇如杵形向外或有雲分為兩彗狀者皆不可攻

凡屠城之氣或赤如飛鳥或赤氣如敗車或有赤黑氣如狸皮斑或城中氣聚如樓出見於外營上有雲如衆人頭赤色其城營皆可屠氣如雉雉臨城其下必有降者

凡伏兵有黑氣渾渾員長赤氣在其中或白氣粉沸起如樓狀或如幢節狀在烏雲中或如赤杵在烏雲中或如鳥人在赤雲中凡暴兵氣白如瓜蔓連結部隊相逐須臾罷而復出或白氣如仙人如仙人衣千萬連結部隊相逐罷而復興當有千里兵來或氣如人持刀楯雲如人色赤所臨城邑有卒兵至或赤氣如人持節兵來未息雲如方虹此皆有暴兵之象

凡戰氣青白如膏如人無頭如死人卧如丹蛇赤氣隨之必大戰殺將四望無雲見赤氣如狗入營其下有流血

凡連陰十日晝不見日夜不見月亂風四起欲雨而無雨名曰蒙

臣有謀霧氣若晝若夜其色青黃更相奄冒乍合乍散亦然視四方常有
大雲五色具者其下賢人隱也青雲潤澤蔽日在西北爲舉賢良雲氣如亂
穰大風將至視所從來雲甚潤而厚大雨必暴至四始之日有黑雲氣如陣
厚大重者多雨氣若霧非霧衣冠不濡見則其城帶甲而趣日出沒時有霧
雲橫截之白者喪烏者驚三日內雨者各解有雲如蛟龍所見處將軍失魄有
雲如鵠尾來蔭國上三日亡有雲赤黃色四塞終日竟夜照地者大臣縱恣有
雲如氣昧而濁賢人去小人在位

凡白虹者百殃之本衆亂所基霧者衆邪之氣陰來冒陽凡白虹霧姦臣謀
君擅權立威晝霧夜明臣志得申

凡夜霧白虹見臣有憂晝霧白虹見君有憂虹頭尾至地流血之象

凡霧氣不順四時逆相交錯微風小雨爲陰陽氣亂之象積日不解晝夜昏闇
天下欲分離

凡天地四方昏濛若下塵十日五日已上或一月或一時雨不沾衣而有土名曰
霾故曰天地霾君臣乖

凡海旁蜃氣爲樓臺廣野氣成宮闕北夷之氣如牛羊群畜穹廬南夷之氣類舟
船幡旗自華以南氣下黑上赤嵩高三河之郊氣正赤恒山之北氣青勃碣海岱
之間氣皆正黑江淮之間氣皆白東海氣如貞簦附漢河水氣如引布江漢氣勁如
杼濟水氣如黑沌渭水氣如狼白尾淮南氣如白羊少室氣如白兔青尾恒山氣如
黑牛青尾東夷氣如樹西夷氣如室屋南夷氣如閣臺或類舟船陣雲如立垣杼
軸雲類軸搏兩端兌灼雲如繩居前亘天其牛半天其螯者類闕旗故鉤雲句曲諸
此雲見以五色占而澤搏密

其見動人及有兵必起合鬪其直雲氣如三疋帛廣前銳後大軍行氣也韓雲如布趙雲如牛楚雲如日宋雲如車魯雲如馬衛如如犬周雲如車輪秦雲如行人魏雲如鼠鄭雲如絳衣越雲如龍蜀雲如困車氣乍高乍下往往而聚騎氣卑而布卒氣搏前卑後高者疾前方而高後銳而卑者却其氣平者其行徐前高後卑者不止而返校騎之氣正蒼黑長數百丈遊兵之氣如彗掃一云長數百丈無根本喜氣上黃下赤怒氣上下赤憂氣上下黑土功氣黃白徙氣白凡候氣之法氣初出時若雲非雲若霧非霧髣髴若可見初出森森然若桑榆上高五六尺者是千五百里外平視則千里舉目望卽五百里仰瞻中天卽百里內平望桑榆間二千里登高而望下屬地者三千里敵在東日出候之在南日中候之在西日入候之在北夜半候之軍上氣高勝下厚勝薄實勝虛長勝

短澤勝枯氣見以知大占期內有大風雨久陰則災不成

天變史傳事驗

惠帝元康二年二月天西北大裂案劉向說天裂陽不足地動陰有餘是時人主昏糴妃后專制

太安三年八月庚午天中裂爲二有聲如雷者三君道虧而臣下專僭之象也是日長沙王奉帝出距成都河間二王後成都河間東海又迭專威命是其應也

穆帝升平五年八月己卯夜天中裂廣三四丈有聲如雷野雉皆鳴是後哀帝荒疾海西失德皇太后臨朝太宗總萬機桓溫專權威振內外陰氣盛陽道一作微氣

元帝太興二年八月戊戌天鳴東南有聲如風水相薄京房易妖占曰天有聲人主憂 三年十月壬辰天又鳴甲午止其後王敦

入石頭王師敗績元帝屈辱制於強臣既而晏駕大耻不雪
安帝隆安五年閏月癸丑天東南鳴十六年九月戊子天東南又
鳴是後桓玄篡位安帝播越憂莫大焉鳴每東南者蓋中興江外
天隨之而鳴也

義熙元年八月天鳴在東南京房易傳曰萬姓勞厥妖天鳴是時
安帝雖反政而兵革歲動衆庶勤勞也

日蝕

魏文帝黃初二年六月戊辰晦日有蝕之有司奏免太尉詔曰灾
異之作以譴元首而歸過股肱豈禹湯罪已之義乎其令百官各
虔厥職後有天地眚勿復劾三公 三年正月景寅朔日有蝕之
十一月庚申晦又日有蝕之 五年十一月戊申晦日有蝕之
明帝太和初太史令許芝奏日應蝕與太尉於靈星祈禳帝曰蓋

聞人主政有不德則天懼之以灾異所以譴告告使得自修也故
日月薄蝕明治道有不當者朕卽位以來既不能光明光帝聖德
而施化有不合於皇神故上天有以寤之宜勅政自修有以報於
神明天之於人猶父之於子未有父欲有責其子而可獻盛饌以
以求免也今外欲遣上公與太史令俱禳宋本禳字下
多一禳字之於義未聞
也羣公卿士大夫其各勉修厥職有可以補朕不逮者各封上之
太和五年十一月戊戌晦日有蝕之
六年正月戊辰朔日有蝕之見吳歷

青龍元年閏月庚寅朔日有食之

少帝正始元年七月戊申朔日有蝕之 三年四月戊戌朔日有
蝕之 四年五月丁丑朔日有蝕之 五年四月景辰朔日有食
之 六年四月壬子朔日有蝕之 十月戊申朔又日有食之

八年二月庚午朔日有蝕之是時曹爽專政丁謚鄧颺等轉改法
度會有日食之變詔羣臣問得失蔣濟上疏曰昔大舜佐治戒在
比周周公輔政慎於其朋齊侯問災晏子對以布惠魯君問異臧
孫荅以緩役塞變應天乃實人事濟言譬甚切而君臣不悟終至
敗亡 九年正月乙未朔日有蝕之

嘉平元年二月己未日有蝕之

高貴鄉公甘露四年七月戊子朔日有蝕之 五年正月乙酉朔
日有蝕之京房易占曰日蝕乙酉君弱臣強司馬將兵反征其王
五月有成濟之變

元帝景元二年五月丁未朔日有蝕之 三年十一月己亥朔日
有蝕之

武帝泰始二年七月景午晦日有蝕之十月景午朔日有蝕之

七年十月丁丑朔日有蝕之 八年十月辛未朔日有蝕之 九

年四月戊辰朔日有蝕之 又七月丁酉朔日有蝕之 十年正

月乙未三月癸亥並日有蝕之咸寧元年七月甲申晦日有蝕之

三年正月景子朔日有蝕之四年正月庚午朔日有蝕之

太康四年三月辛丑朔日有蝕之 七年正月甲寅朔日有蝕之

八年正月戊申朔日有蝕之 九年正月壬申朔六月庚子朔並
日有蝕之

永熙元年四月庚申帝崩

惠帝元康九年十一月甲子朔日有蝕之 十二月廢皇太子適
為庶人尋殺之

永康元年正月己卯四月辛卯朔並日有蝕之

永寧元年閏月景戌朔日有蝕之

光熙元年正月戊子朔七月乙酉朔並日有蝕之十一月惠帝崩
十二月壬午朔又日有蝕之

懷帝永嘉元年十一月戊申朔日有蝕之 二年正月景子朔日
有蝕之 六年二月壬子朔日有蝕之

愍帝建興四年六月丁巳朔十二月甲申朔並日有蝕之 五年
五月景子十一月景子並日有蝕之時帝蒙塵于平陽

元帝太興元年四月丁丑朔日有蝕之

明帝太寧三年十一月癸巳朔日有蝕之在卯至斗斗吳分也其
後蘇峻作亂

成帝咸和二年五月甲申朔日有蝕之在井井主酒食女主象也
明年皇太后以憂崩 六年三月壬戌朔日有蝕之是時帝已年

長每幸司徒第猶出入見王導夫人曹氏如子弟之禮以人君而

敬人臣之妻有虧君德之象也 九年十月乙未朔日有蝕之是

時帝既冠當親萬機而委政大臣者君道有虧也

咸康元年十月乙未朔日有蝕之 七年二月甲子朔日有蝕之

三月杜皇后崩 八年正月乙未朔日有蝕之京都大雨郡國以
聞是謂三朝王者惡之六月而帝崩

穆帝永和二年四月巳酉七年正月丁酉八年正月辛卯並日有
蝕之 十二年十月癸巳朔日有蝕之在尾尾燕分北狄之象也

是時邊表姚襄苻生互相吞噬朝廷憂勞征伐不止

升平四年八月辛丑朔日有蝕之幾既在角凡蝕淺者禍淺深者
禍大角爲天門人主惡之明年而帝崩

哀帝隆和元年三月甲寅朔十二月戊午朔並日有蝕之明年而
帝有疾不識萬機

海西公太和三年三月丁巳朔五年七月癸酉朔並日有蝕之皆海西被廢之應也

孝武帝寧康三年十月癸酉朔日有蝕之

太元四年閏月巳酉朔日有蝕之是時苻堅攻沒襄陽執朱序

六年六月庚子朔日有蝕之 九年十月辛亥朔日有食之 十

七年五月丁卯朔日有蝕之 二十年三月庚辰朔日有蝕之明

年帝崩

安帝隆安四年六月庚辰朔日有蝕之是時元顯執政

元興二年四月癸巳朔日有蝕之其冬桓玄篡位

義熙三年七月戊戌朔日有蝕之 十年九月丁巳朔日有蝕之

十一年七月辛亥晦日有蝕之 十三年正月甲戌朔日有蝕之

明年帝崩

恭帝元熙元年十一月丁亥朔日有蝕之自義熙元年至是日蝕日從上始皆為革命之徵

周禮眡祲氏掌十輝之法以觀妖祥辯吉凶有祲象鑄監闔膏彌序濟想凡十後代名變說者莫同今錄其著應以次之云

吳孫權赤烏十一年二月白虹貫日權發詔戒懼

武帝泰始五年七月甲寅日暈再重白虹貫之

太康元年正月巳丑朔五色氣冠日自卯至酉占曰君道失明丑

為斗牛王吳越是時孫皓淫暴四月降

惠帝元康元年十一月甲申日暈再重青赤有光 九年正月日

中有若飛鷲者數日乃消王隱以為愍懷廢死之徵

永康元年正月癸亥朔日暈三重十月乙未日闇黃霧四塞占曰

不及二年下有拔城大戰十二月庚戌日中有黑氣京房易傳曰

祭天不順茲謂逆厥異日中有黑氣

永寧元年九月甲申日中有黑子京房易占黑者陰也臣不掩君惡令下見百姓惡君則有此變又曰臣有蔽主明者

太安元年十一月日中有黑氣

永興元年十一月日中有黑氣分日

光熙元年五月壬辰癸巳日光四散赤如血流照地皆赤甲午又如之占曰君道失明

懷帝永嘉元年十一月乙亥黃黑氣掩日所照皆黃按河圖占曰日薄也其說曰凡日蝕皆於朔晦有不於晦朔者為日薄雖非日月同宿時陰氣盛掩日光也占類日蝕二年正月戊申白虹貫日二月癸卯白虹貫日青黃暈五重占曰白虹貫日近臣為亂不則諸侯有反者暈五重有國者受其祥天下有兵破亡其地明年

司馬越暴茂人主五年劉聰破京都帝蒙塵于寇庭五年三月

庚申日散光如血下流所照皆赤日中有若飛鷲者

愍帝建興二年正月辛未庚時日墮于地又有三日相承出於西方而東行五年正月庚子三日並照虹蜺彌天日有重暈左右兩珥占曰白虹兵氣也三四五六日俱出並爭天下兵作丁巳亦如其數又曰三日並出不過三旬諸侯爭為帝日重暈天下有立王暈而珥天下有立侯故陳卓曰當有大慶天下其三分乎三月而江東改元為建武劉聰李雄亦跨曹劉疆宇於是兵連累葉元帝太興元年十一月乙卯日夜出高三丈中有赤青珥四年二月癸亥日闕三月癸未日中有黑子辛亥帝親錄訊囚徒永昌元年十月辛卯日中有黑子時帝寵幸劉隗擅威福虧傷君道王敦因之舉兵逼京都禍及忠賢

明帝太寧元年正月己卯朔日暈無光癸巳黃霧四塞占曰君道
失明陰陽昏臣有陰謀京房曰下專刑茲謂分威蒙微而日不明
先是王敦害尚書令刁協僕射周顛驃騎將軍戴若思等是專刑
之應敦既陵上卒伏其辜十一月景子白虹貫日史官不見桂陽
太守華包以聞

成帝咸和九年七月白虹貫日

咸康元年七月白虹貫日 二年七月白虹貫日自後庾氏專政
由后族而貴蓋亦婦人擅國之義故頻年白虹貫日 八年正月
壬申日中有黑子景子乃滅夏帝崩

穆帝永和八年張重華在涼州日暴赤如火中有三足鳥形見分
明五日乃止 十年十月庚辰日中有黑子大如雞卵 十一年
三月戊申日中有黑子大如桃二枚時天子幼弱久不親國政

升平三年十月丙午日中有黑子大如雞卵少時而帝崩

海西公太和三年九月戊辰夜二虹見東方 四年四月戊辰日
暈厚密白虹貫日中十月乙未日中有黑子 五年二月辛酉日
中有黑子大如李 六年三月辛未白虹貫日日暈五重十一月
桓溫廢帝卽簡文咸安元年也

簡文咸安二年十一月丁丑日中有黑子

孝武寧康元年十一月己酉日中有黑子大如李 二年三月庚
寅日中有黑子二枚大如鴨卵十一月己巳日中有黑子大如雞
卵時帝已長而康獻皇后以從嫂臨朝實傷君道故日有瑕也

太元十三年二月庚子日中有黑子二大如李 十四年六月辛
卯日中又有黑子大如李 二十年十一月辛卯日中又有黑子
是時會稽王以母弟干政

安帝隆安元年十二月壬辰日暈有背璫是後不親萬機會稽王世子元顯專行威罰 四年十一月辛亥日中有黑子

元興元年二月甲子日暈白虹貫日中三月庚子白虹貫日未幾桓玄尅京都王師敗績明年玄篡位

義熙元年五月庚午日有彩珥 六年五月景子日暈有璫時有盧循逼京都內外戒嚴七月循走 七年七月五虹見東方占曰

天子黜其後劉裕代晉 十年日在東井有白虹十餘丈在南干日灾在秦分秦亡之象

恭帝元熙二年正月壬辰白氣貫日東西有直珥各一丈白氣貫之交匝

月變

魏文帝黃初四年十一月月暈北斗占曰有大喪赦天下七年五

月帝崩明帝卽位大赦天下

孝懷帝永嘉五年三月壬申丙夜月蝕既丁夜又蝕既占曰月蝕盡大人憂又曰其國貴人死

海西公太和四年閏月乙亥月暈軼復有白暈貫月北暈斗柄三星占曰王者惡之六年桓溫廢帝

安帝隆安五年三月甲子月生齒占白月生齒天子有賊臣羣下自相殘桓玄篡逆之徵也

義熙九年十二月辛卯朔月猶見東方是謂之仄匿則侯王其肅是時劉裕輔政威刑自己仄匿之應云 十一年十一月乙未月入輿鬼見而暈占曰主憂財寶出一日月暈有赦

月奄犯五緯

凡月蝕五星其國皆亡五星入月其野有逐相

魏明帝太和五年十二月甲辰月犯填星青龍二年十月巳一作丑月又犯填星占同上戊寅月犯太白占曰人君死又爲兵景初元年七月公孫懿叛二年正月遣宣帝討之三年正月天子崩四年三月巳巳太白與月俱加景晝見月犯太白占同上

景初元年十月丁未月犯熒惑占曰貴人死二年四月司徒韓暨薨

齊王嘉平元年正月甲午太白襲月宣帝奏永寧太后廢曹爽等

惠帝太安二年十一月庚辰歲星入月中占曰國有逐相十二月

壬寅太白犯月占曰天下有兵三年正月巳卯月犯太白占同

青龍元年七月左衛將軍陳耽等率眾奉帝伐成都王六軍敗績兵逼乘輿後二年帝崩

元帝太興二年十一月辛巳月犯熒惑占曰有亂臣三年十二

月巳未太白入月在斗郭璞曰月屬坎陰府法象也太白金行而來犯之天意若曰刑理失中自毀其法四年十二月丁亥月犯歲星在房占曰其國兵飢人流亡

永昌元年三月王敦作亂率江荆之眾來攻敗京師一作都殺將相又鎮北軍劉隗出奔百姓並去南畝困於兵革四月又殺湘州刺史譙王司馬承鎮南將軍甘卓

成帝咸康元年二月乙未太白入月四月甲午月犯太白四年四月巳巳七月乙巳月俱奄太白占曰人君死又爲兵人主惡之

明年石季龍之眾大寇沔南於是內外戒嚴五年四月辛未月犯歲星在胃占曰國飢人流乙未月犯歲星在昴及冬有沔南邾城之敗百姓流亡萬餘家六年二月乙未太白入月占曰人主死四月甲午月犯太白占曰人主惡之

穆帝永和八年十二月月在東井犯歲星占曰秦飢人流亡是時
兵革連起 十年十一月月奄填星在輿鬼占曰秦有兵時桓溫
伐苻健健堅壁長安溫退 十二年八月桓溫破姚襄

升平元年十一月壬午月奄歲星在房占曰人飢一曰豫州有灾
二年閏三月乙亥月犯歲星在房占同上三年豫州刺史謝萬敗

三年三月乙酉月犯太白在昴占曰人君死一曰趙地有兵宋本多胡
不安四年正月慕容雋卒 五年正月乙丑辰時月在危宿奄太

白占曰天下靡散三月丁未月犯填星在軫占曰為大喪五月穆
帝崩七月慕容恪攻冀州刺史呂護於野王拔之護奔走時桓溫
以大衆次宛聞護敗乃退

哀帝興寧元年十月景戌月奄太白在頷女占曰天下靡散一曰
灾在揚州二年洛陽沒其後桓溫傾揚州資寔北討敗績死亡太

半及征袁真淮南殘破後慕容暉及苻堅互來侵境 二年正月

乙卯月奄歲星在參占曰參益州分也六月鎮西將軍益州刺史
周撫卒十月梁州刺史司馬勲入益州以叛朱序率衆助刺史周
楚討平之

海西太和元年二月景子月奄熒惑在參占曰為內亂帝不終之
徵一曰參魏地五年慕容暉為苻堅所滅

孝武太元十二年二月戊寅熒惑入月占曰有亂臣死若有相戮
者一曰女親為政天下亂是時琅邪王輔政王妃從兄王國寶以
姻昵一作妮受寵又陳郡人袁悅昧私苟進交構王相扇揚朋黨十二

年帝殺悅於市於是主相有隙亂階興矣 十三年十一月戊子
辰星入月在危占曰賊臣欲殺主不出三年必有內惡是後慕容
垂翟遼姚萇苻登慕容永並阻兵爭強 十四年十二月乙未月

犯歲星占並同上十五年翟遼據司寇衆軍累討弗剋慕容氏又跨略并冀七月旱八月諸郡大水兗州又蝗 十八年正月乙酉熒惑入月占曰憂在宮中非賊乃盜也一曰有亂臣若有戮者二十一年九月帝暴崩內殿兆庶宣言夫人張氏潛行大逆又王國寶邪狡卒伏其辜 十九年四月己巳月奄歲星在尾占曰爲飢燕國亡二十年慕容垂遣息寶伐魏反爲所破死者數萬人二十一年垂死國遂衰亡

安帝隆安元年六月庚午月奄太白在太微端門外占曰國受兵乙酉月奄歲星在東壁占曰爲飢衛地有兵 二年六月郗恢遣鄧啟方等以萬人伐慕容寶於滑臺啟方敗 三年九月桓玄等並舉兵於是內外戒嚴 四年正月乙亥月犯填星在牽牛占曰吳越有兵喪女王憂 六年乙未月又犯填星在牽牛十月乙未

月奄歲星在北河占曰爲飢胡有兵其四年五月孫恩破會稽殺內史謝琰後又破高雅之於餘姚死者十七八七月太和太后李氏崩元興元年孫恩寇臨海人衆餓死散亡殆盡

元興元年四月辛丑月奄辰星七月大飢人相食 二年十一月辛巳月犯熒惑占悉同上二年十二月桓玄篡位放遷帝后於尋陽以永安何皇后爲遷陵君三年二月劉裕盡誅桓氏 三年二月甲辰月奄歲星於左角占曰天下兵起是年三月景辰劉裕起義兵殺桓修等明年正月衆軍攻桓振卒滅諸桓

義熙元年四月己卯月犯填星在東壁占曰其地亡國一曰貴人歿七月己未月奄填星東壁占曰其國以伐亡一曰人流十月丁巳月奄填星在營室占同上十一月荊州刺史魏詠之卒二年二月司馬國璠等攻沒弋陽三年司徒揚州刺史王謐薨四年正月

太保武陵王遵薨三月左僕射孔安國薨 二年十二月景午月
奄太白在危占曰齊亡國一曰彊國君死五年四月劉裕大軍北
討慕容超卒滅之 七年六月庚子月犯歲星在畢占曰有邊兵
且飢 八月乙未月犯歲星在參占曰益州兵飢七月朱齡石尅
蜀蜀人尋反又討之 八年正月庚戌月犯歲星在畢占同上九
年七月朱齡石滅蜀 十二年五月甲申月犯歲星在左角占曰
爲飢 十四年四月壬申月犯填星於張占曰天下有大喪其明
年帝崩

恭帝元熙元年七月月犯歲星占悉同上十二月丁巳月犯太白
于羽林二年六月帝遜位禪宋
五星聚舍

魏明帝太和四年十一月壬戌太白犯歲星占曰太白犯五星有
太兵五年三月諸葛亮以大衆寇天水時宣帝爲大將軍距退之
青龍二年二月己未太白犯熒惑占曰大兵起有大戰是年四月
諸葛亮據渭南吳亦起兵應之魏東西奔命

惠帝元康三年填星歲星太白三星聚于畢昴占曰爲兵喪畢昴
趙地也後賈后陷殺太子趙王廢后又殺之斬張華裴頠遂篡位
廢帝爲太上皇天下從此遘亂連禍

永寧二年十一月熒惑太白闔于虛危占曰大兵起破軍殺將虛
危又齊分也十二月熒惑襲太白于營室占曰天下兵起亡君之
戒一曰易相初齊王冏之京都因留輔政遂專傲無君是日成都
河間檄長沙王又討之冏又交戰攻焚宮闕冏兵敗夷滅又殺其
兄上軍將軍實以下二十餘人太安二年成都又攻長沙於是公
私飢困百姓力屈

太安三年正月熒惑犯歲星占曰有戰七月左衛將軍陳耽奉帝
伐成都六軍敗績

光熙元年九月填星犯歲星占曰填與歲合爲內亂是時司馬越
專權終以無禮破滅內亂之應也十二月癸未太白犯填星占曰
爲內兵有大戰是後河間王爲東海王越所殺明年正月東海王
越殺諸葛玫等五月汲桑破馮嵩殺東燕王八月苟晞太破汲桑
懷帝永嘉六年七月熒惑歲星太白聚牛女之間徘徊進退案占
曰牛女揚州分是後兩都傾覆而元帝中興揚土

建武元年五月癸未太白熒惑合於東井占曰金火合曰爍爲喪
是時愍帝蒙塵于平陽七月崩于寇庭

元帝太興二年七月甲午歲星熒惑會于東井入月乙未太白犯
歲星合在翼占曰爲兵飢

三年六月景辰太白與歲星合于房占同上永昌元年王敦攻京
師六軍敗績王敦尋死

成帝咸康三年十一月乙丑太白犯歲星于營室占曰爲兵飢四
年二月石季龍破幽州遷萬餘家以南五年季龍衆五萬寇河南
略七千餘家而去又騎二萬圍陷邾城殺略五千餘人 四年十

二月癸丑太白犯填星在箕占曰王者亡地七年慕容皝自稱燕
王 七年三月太白熒惑合于太微中犯左執法明年顯宗崩

八年十二月巳酉太白犯熒惑于胃占曰大兵起其後庾翼大發
兵謀伐石季龍專制上流

康帝建元元年八月丁未太白犯歲星在軫占曰有大兵是年石
季龍將劉寧寇沒狄道

穆帝永和四年五月熒惑入婁犯填星占曰兵大起有喪災在趙

其年石季龍死來年冉閔殺石遵及諸胡十萬餘人其後褚裒北伐喪衆而薨 六年三月戊戌熒惑犯歲星占曰爲戰 七年三月戊子歲星熒惑合于奎其年劉顯殺石祗及諸胡帥中土大亂十二年七月丁卯太白犯填星在柳占曰周地有大兵其年八月桓溫伐苻健退因破姚襄於伊水定周地

升平二年八月戊午熒惑犯填星在張占曰兵大起 三年八月庚午太白犯填星在太微中占曰王者惡之 五年十月丁卯熒惑犯歲星在營室占曰大臣有匿謀一曰衛地有兵時桓溫擅權謀移晉室

海西公太和元年八月戊午太白犯歲星在太微中 三年六月甲寅太白奄熒惑在太微端門中其宋本無其字六年海西公廢簡文咸安二年正月巳酉歲星犯填星在須女占曰爲內亂七月

帝崩桓溫擅權謀殺侍中王坦之等內亂之應

孝武寧康二年十一月癸酉太白奄熒惑在營室占曰金火合爲爍爲兵喪太元元年七月苻堅伐涼州破之虜張天錫

太元十一年十二月巳丑太白犯歲星占曰爲兵飢是時河朔未平兵連在外冬大飢 十七年九月丁丑歲星熒惑填星同在亢氏十二月癸酉填星去熒惑歲星猶合占曰三星合是謂驚立絕行內外有兵喪與飢改立王公 十九年十月太白填星熒惑辰星合于氏十二月癸丑太白犯歲星在斗占曰爲亂飢爲內兵斗吳越分至陰安元年王恭等舉兵顯王國寶之罪朝廷殺之是後連歲水旱飢

安帝隆安元年二月歲星熒惑皆入羽林占曰中軍兵起四月王恭等舉兵內外戒嚴

元興元年八月庚子太白犯歲星在上將東南占曰楚兵飢一曰
灾在上將二年桓玄篡位三年劉裕盡誅桓氏 二年十月丁丑
太白犯填星在婁占同上 三年二月壬辰太白熒惑合于羽林
二年十二月桓玄篡位放遷帝后三年二月劉裕起義兵桓玄逼
帝東下

義熙二年十二月丁未熒惑太白皆入羽林又合于壁三年正月
慕容超寇淮北徐州至下邳八月遣劉敬宣伐蜀 三年二月癸
亥熒惑填星太白辰星聚于奎婁從填星北徐州分是時慕容超
僭號于齊兵連徐兗連歲寇抄至于淮泗姚興譙縱僭號秦蜀盧
循及魏南北交侵其五年劉裕北殄慕容超其六月辛卯熒惑犯
辰星在翼占曰天下兵起八月己卯太白奄熒惑占曰有大兵其
四年姚略遣衆征赫連勃勃大爲所破 五年四月甲戌熒惑犯

辰星在東井占曰皆爲兵十二月辛丑太白犯歲星在奎占曰大
兵起魯有兵是年四月劉裕討慕容超六年二月滅慕容超于魯
地 七年二月丁卯歲星犯填星在參占曰歲填合爲內亂一曰
益州戰不勝亡地是時朱齡石伐蜀後竟滅之明年誅謝混劉毅
八年十月甲申太白犯填星在東井占曰秦有大兵 九年二月
景午熒惑填星皆犯東井占曰秦有兵三月壬辰歲星熒惑填星
太白聚于東井從歲星也東井秦分 十三年劉裕定關中其後
遂移晉祚 十四年十月癸巳熒惑入太微犯西蕃上將仍順行
至左掖門內留二十日乃逆行至恭帝元熙元年三月五日出西
蕃上將西三尺許又順還入太微時填星在太微熒惑繞填星成
鉤已其年四月景戌從端門出占曰熒惑與填星鉤已天庭天下
更紀十二月安帝母弟琅邪王踐祚是曰恭帝來年禪于宋

晉書十二 志卷第一 終

晉書十三

志第三

天文下

月五星犯列舍
星流隕 雲氣
經星變附見

經星變附見

妖星客星

晉書十三 志第三

月五星犯列舍

魏文黃初四年三月癸卯月犯心大星占曰心為天王位王者惡之六月甲申太白晝見案劉向五紀論曰太白少陰弱不得專行故以巳未為界不得經天而行經天則晝見其占為兵喪為不臣為更王疆國弱小國彊是時孫權受魏爵號而稱兵距守其十二月景子月犯心大星占同上

五年十月乙卯太白晝見占同上又歲星入太微逆行積百四十九日乃出占曰五星入太微從右入三十日以上人主有大憂一曰有赦至七年五月帝崩明帝即位大赦天下六年五月壬戌熒

惑入太微至壬申與歲星相及俱犯右執法至癸酉乃出占曰從右入三十日以上人主有大憂又日月五星犯左右執法大臣有憂一曰執法者誅金火尤甚十一月皇子東武陽王鑿薨七年正月驃騎將軍曹洪免為庶人四月征南大將軍夏侯薨五月帝崩蜀記稱明帝問黃權曰天下鼎立何地為正對曰當驗天文往者熒惑守心而文帝崩吳蜀無事此其徵也案三國史並無熒惑守心之文疑是入太微八月吳遂圍江夏寇襄陽大將軍宣帝救襄陽斬吳將張霸等兵喪更王之應也

明帝太和五年五月熒惑犯房占曰房四星服肱臣將相位也月五星犯守之將相有憂其七月車騎將軍張郃追諸葛亮為亮所害十二月太尉華歆薨其十一月乙酉月犯軒轅大星占曰女主憂

六年三月乙亥月又犯軒轅大星十一月景寅太白晝見南斗遂歷八十餘日恒見占曰吳有兵明年孫權遣張彌等將兵萬人錫授公孫文懿為燕王文懿斬彌等虜其眾青龍三年正月太后郭氏崩

青龍三年三月辛卯月犯輿鬼輿鬼主斬殺占曰人多病國有憂又曰大臣憂是年夏及冬大疫四年五月司徒董昭薨其五月丁亥太白晝見積三十餘日以晷度推之非秦魏則楚也是時諸葛亮據渭南宣帝與相持孫權寇合肥又遣陸議孫昭等入淮沔天子親東征蜀本秦地則為秦魏及楚兵悉起矣其七月己巳月犯鍵閉占曰有火災三年七月崇華殿災三年六月丁未填星犯井鉞戊戌太白又犯之占曰凡月五星犯井鉞悉為兵災一曰斧鉞用大臣誅七月己丑填星犯東井距星占曰填星入井大人憂行

近距爲行陰其占曰大水五穀不成景初元年夏大水傷五穀其
年十月壬申太白晝見在尾歷二百餘日恒晝見占曰尾爲燕有
兵十二月戊辰月犯鉤鈴占曰王者憂

四年閏正月巳巳填星犯并鉞三月癸卯填星犯東井巳巳太白
與月加景晝見五月壬寅太白犯畢左股第一星占曰畢爲邊兵
又主刑罰九月涼州塞外胡阿畢師使侵犯諸國西域校尉張就
討之斬首捕虜萬計其年七月甲寅太白犯軒轅大星占曰女王
憂景初元年皇后毛氏崩

景初元年二月乙酉月犯房第二星占曰將軍有憂其七月司徒
陳矯薨二年四月司徒韓暨薨其七月辛卯太白晝見積二百八十
餘日時公孫文懿自立爲燕王署置百官發兵距守宣帝討滅之
二年二月巳丑月犯心距星又犯中央大星五月乙亥月又犯心

距星及中央大星案占曰王者惡之犯前星太子有憂三年正月
帝崩太子立卒見廢其年十月甲午月犯箕占曰將軍死正始元
年四月車騎將軍黃權薨其閏十一月癸丑月犯心中央大星
少帝正始元年四月戊午月犯昴東頭第一星十月庚寅月又犯
昴北第四星占曰月犯昴胡不安二年六月鮮卑阿妙兒等寇西
方敦煌太守王延破之斬二萬餘級三年又斬鮮卑大師及千餘
級二年九月癸酉月犯輿鬼西北星三年二月丁未又犯西南星
占曰有錢令一曰大臣憂三年二月太尉滿寵薨四年正月帝加
元服賜羣臣錢各有差

四年十月十一月月再犯并鉞是月宣帝討諸葛恪恪棄城走五
年二月曹爽征蜀

五年十一月癸巳填星犯亢距星占曰諸侯有失國者

七年七月丁丑月犯左角占曰天下有兵左將軍死七月乙亥熒惑犯畢距星占曰有邊兵一曰刑罰用

九年正月辛亥月犯亢南星占曰兵起一曰將軍死七月癸丑填犯捷閉占曰王者不宜出宮下殿 嘉平元年天子謁陵宣帝奏誅曹爽等天子野宿於是失勢

嘉平元年六月壬戌太白犯東井距星占曰國失政大臣爲亂四月辛巳太白犯輿鬼占曰大臣誅一曰兵起

二年三月己未太白又犯井距星三年七月王凌與楚王彪有謀皆伏誅人主遂卑

吳孫權赤烏十三年夏五月日北至熒惑逆行入南斗秋七月犯魁第三星而東漢晉春秋云逆行案占熒惑入南斗三月吳王死一曰熒惑逆行其地有死君太和二年權薨是其應也故國志書

於吳是時王凌謀立楚王彪謂斗中有星當有暴貴者以問知星人浩詳詳疑有故欲悅其意不言吳有死喪而言淮南楚分吳楚同占當有王者興故凌計遂定

嘉平二年十二月景申月犯輿鬼

三年四月戊寅月犯東井五月甲寅月犯亢距星占曰軍將死一曰爲兵是月王凌楚王彪等誅七月皇后甄氏崩四年三月吳將爲寇鎮東將軍諸葛誕破走之其年七月己巳月犯輿鬼九月乙巳又犯之十月癸未熒惑犯亢南星占曰臣有亂四年十一月丁未月又犯鬼積尸五年六月戊午太白犯角占曰羣臣有謀不成庚辰月犯箕星占曰將軍死七月月犯井鉞景午月又犯鬼西北星占曰國有憂十一月癸酉月犯東井距星占曰將軍死正元元年正月鎮東將軍毋丘儉揚州刺史文欽反兵俱敗誅死二月李

豐及弟翼后父張緝等謀亂事泄悉誅皇后張氏廢九月帝廢爲齊王蜀將姜維攻隴西車騎將軍郭淮討破之

高貴鄉公正元二年二月戊午熒惑犯東井北轅西頭第一星甘露元年七月乙卯熒惑犯東井鉞星壬戌月又犯鉞星八月辛亥月犯箕吳廢孫亮 太平元年九月壬辰太白犯南斗吳志所書也占曰太白犯斗國有兵大臣有反者其明年諸葛誕反又明年孫綝廢亮吳魏並有兵事也

甘露元年九月丁巳月犯東井二年六月巳酉月犯心中央大星八月壬子歲星犯井鉞九月庚寅歲星逆行乘井鉞十月景寅太太白犯亢距星占曰逆臣爲亂人君憂景元元年五月有成濟之變及諸葛誕誅皆其應也

二年三月庚子太白犯東井占曰國失政大臣爲亂是夜歲星又

犯東井占曰兵起至景元元年高貴鄉公敗

三年八月壬辰歲星犯輿鬼鑽星占曰斧鑽用大臣誅四年四月甲申歲星又犯輿鬼東南星占曰鬼東南星主兵木入鬼大臣誅景元元年殺尚書王經

元帝景元元年二月月犯建星案占曰五星犯建星大臣相譖是後鍾會鄧艾破蜀會譖艾

二年四月熒惑入太微犯右執法占曰人主有大憂一云大臣憂四年十月歲星守房占曰將相憂一云有大赦明年鄧艾鍾會皆夷滅赦蜀土五年帝遜位

武帝咸寧四年九月太白當見不見占曰是謂失舍不有破軍必有亡國是時羊祜表求伐吳上許之五年十一月兵出太白始夕見西方太康元年三月大破吳軍孫皓面縛請罪吳國遂亡

太康八年三月熒惑守心占曰王者惡之太熙元年四月乙酉帝崩

惠帝元康三年四月熒惑守太微六十日占曰諸侯三公謀其上必有斬臣一曰天子亡國是春太白守畢至是百餘日占曰有急令之憂一曰相死又為邊境不安後賈后陷殺太子

六年十月乙未太白晝見九年六月熒惑守心占曰王者惡之八月熒惑入羽林占曰禁兵大起其後帝見廢為太上皇俄而三王起兵討趙王倫倫悉遣中軍兵相距累月

永康元年三月中台星拆太白晝見占曰台星失常三公憂太白晝見為不臣是月賈后殺太子趙王倫尋廢殺后斬司空張華其五月熒惑入南斗占曰宰相死兵大起斗又吳分野是時趙王倫為相明年篡位三王一作公興師誅之大安二年石冰破揚州其八月

熒惑入箕占曰人主失位兵起明年趙王倫篡位改元二年二月太白出西方逆行入東井占曰國失政大臣為亂是時齊王冏起兵討趙王倫倫滅冏擁兵不朝專權淫奢明年誅死

永寧元年自正月至于閏月五星互經天縱橫無常星傳曰日陽君道也星陰臣道也日出則星亡臣不得專也晝而星見于宋本上

者為經天其占為不臣為更王今五星悉經天天變所未有也石氏說曰辰星晝見其國不亡則大亂是後台鼎方伯互執大權二帝流亡遂至六夷更王迭據華夏亦載籍所未有也其四月歲星晝見五月太白晝見占同前七月歲星守虛危占曰木守虛危有兵憂虛危齊分一曰守虛饑守危徭役煩多下屈竭辰星入太微占曰為內亂一曰羣臣相殺太白守右掖門占曰為兵為亂為賊八月戊午填星犯左執法又犯上相占曰上相憂熒惑守昴占曰

趙魏有災辰星守輿鬼占曰秦有災九月丁未月犯左角占曰人主憂一曰左衛將軍死天下有兵

二年四月癸酉歲星晝見占曰爲臣彊初齊王罔定京都因畱輔政遂專傲無君是月成都河間檄長沙王又討之罔又交戰攻焚宮闕罔兵敗夷滅又殺其兄上軍將軍寔以下二十餘人太安二年成都攻長沙於是公私飢困百姓力屈

太安二年二月太白入昴占曰天下擾兵大起七月熒惑入東井占曰兵起國亂是秋太白守太微上將占曰上將以兵亡是年冬成都河間攻洛陽八月長沙王奉帝出距二王二年正月東海王越執長沙王又張方又殺之

三年正月熒惑入南斗占同永康七月左衛將軍陳耽率衆奉帝伐成都六軍敗績兵偪乘輿是時天下盜賊羣起張昌尤盛

永興元年七月庚申太白犯角亢經房心歷尾箕九月入南斗占曰犯角天下大戰犯亢有大兵人君憂入房心爲兵喪犯尾箕女主憂一曰天下大亂入南斗有兵喪一曰將軍爲亂其所犯守又充豫幽冀揚州之分野是年七月有蕩陰之役九月王浚殺幽州刺史和演攻鄴鄴潰於是充豫爲天下兵衝陳敏又亂揚土劉元海石勒李雄等並起微賤跨有州郡皇后羊氏數被幽廢皆其應也二年四月景子太白犯狼星占曰大兵起九月歲星守東井占曰有兵井又秦分野是年苟晞破公師蕃張方破范陽王虓關西諸將攻河間王顥奔走東海王迎殺之

光熙元年四月太白失行自翼入尾箕占曰太白失行而北是謂反生不有破軍必有屠城五月汲桑攻鄴魏郡太守馮嵩出戰大敗桑遂害東燕王騰殺萬餘人焚燒魏時宮室皆盡其九月丁未

熒惑守心占曰王者惡之巳亥填星守房心占曰填守房多禍喪
守心國內亂天下赦是時司馬越專權終以無禮破滅內亂之應
也十一月帝崩懷帝卽位大赦天下

懷帝永嘉元年十二月丁亥星流震散按劉向說天官列宿在位
之象其衆小星無名者衆庶之類此百官衆庶將流散之象也是
後天下大亂百官萬姓流移轉死矣

二年正月庚午太白伏不見二月庚子始晨見東方是謂當見不
見占同上條其後破軍殺將不可勝數帝崩虜庭中夏淪覆

三年正月庚子熒惑犯紫微占曰當有野死之王又爲火燒宮是
時太史令高堂冲奏乘輿宜遷幸不然必無洛陽五年六月劉曜
王彌入京都焚燒宮廟執帝歸平陽

三年填星久守南斗占曰填星所居久者其國有福是時安東將

軍琅邪王始有揚土其年十一月地動陳卓以爲是地動應也

五年十月熒惑守心六年六月丁卯太白犯太微占曰兵入天子
庭王者惡之七月帝崩于寇庭天下行服大臨

元帝太興元年七月太白犯南斗占曰吳越有兵大人憂

二年二月甲申熒惑犯東井占曰兵起貴臣相戮八月巳卯太白
犯軒轅大星占曰後宮憂

三年五月戊子太白入太微又犯上將星占曰天子自將上將誅

九月太白犯南斗十月巳亥熒惑在東井居五諸侯南踟躕留積

三十日占曰熒惑守井二十日以上大人憂守五諸侯諸侯有誅

者永昌元年三月王敦率江荆之衆來攻京都六軍距戰敗績人
主謝過而已於是殺護軍將軍周覲尚書令刁協驃騎將軍戴若
思又鎮北將軍劉隗出奔四月又殺湘州刺史譙王司馬承鎮南

將軍甘卓閏十二月帝崩

明帝太寧三年正月熒惑逆行入太微占曰爲兵喪王者惡之閏八月帝崩後二年蘇峻反攻焚宮室太后以憂偏崩天子幽劫于石頭城遠近兵亂至四年乃息

成帝咸和六年正月景辰月入南斗占曰有兵是月石勒殺略婁武進二縣人明年石勒衆又抄略南涉海虞其十一月熒惑守胃昴占曰趙魏有兵八年七月石勒死石季龍自立是時雖二石僭號而其疆弱常占於昴不關太微紫宮也

八年三月巳巳月入南斗與六年占同其年七月石勒死彭彪以譙石生以長安郭權以秦州並歸順於是遣督護喬球率衆救彪彪敗球退又石季龍石斌攻滅生權其七月熒惑入昴占曰胡王死一曰趙地有兵是月石勒死石季龍多所攻沒八月月又犯昴

占曰胡不安

九年三月巳亥熒惑入輿鬼犯積尸占曰兵在西北有沒軍死將六月八月月又犯昴是時石弘雖襲勒位而石季龍擅威橫暴十一月廢弘自立遂幽殺之

咸康元年二月巳亥太白犯昴占曰兵起歲中旱四月石季龍略騎至歷陽加司徒王導大司馬治兵列戍衝要是時石季龍又圍襄陽六月旱其年二月景戌月入昴占曰胡王死八月戌戌熒惑入東井占曰無兵兵起有兵兵止十一月月犯昴

二年正月辛亥月犯房南第二星八月月又犯昴九月庚寅太白犯南斗因晝見占曰斗爲宰相又揚州分金犯之死喪之象晝見爲不臣又爲兵喪其後石季龍僭稱天王發衆七萬四年二月自隴西攻段遼于薊又襲慕容皝於棘城不克皝擊破其將麻秋并

虜段遼殺之

三年七月巳酉月犯房上星八月熒惑入輿鬼犯積尸甲戌月犯東井距星九月戊子月犯建星

四年四月巳巳太白晝見在柳占曰爲兵爲不臣明年石季龍大寇沔南於是內外戒嚴其五月戊戌熒惑犯右執法占曰大臣死執政者憂九月太白又犯右執法案占五星災同金水尤甚十一月戊子太白犯房上星占曰上相憂

五年四月乙未月犯畢距星占曰兵起七月巳酉月犯房上星占曰將相憂是月庚申丞相王導薨庾冰代輔政八月太尉郗鑒薨又有沔南邾城之敗百姓流亡萬餘家六年正月征西大將軍庾亮薨

六年三月甲辰熒惑犯太微上將星占曰上將憂四月丁丑熒惑

犯右執法占曰執政者憂六月乙亥月犯牽牛中央星占曰大將憂是時尚書令何充爲執法有譴欲避其咎明年求爲中書令其四月景午太白犯畢距星占曰兵革起一曰女主憂六月乙卯太白犯軒轅大星占曰女主憂七年三月皇后杜氏崩

七年三月壬午月犯房四月巳丑太白入輿鬼五月太白晝見八月辛丑月犯輿鬼八年六月熒惑犯房上第二星占曰次相憂八月壬寅月犯畢占曰下犯上兵革起十月月又掩畢大星占同上其建元元年車騎將軍庾冰薨庾翼大發兵謀伐石季龍專制上流朝廷憚之

康帝建元二年正月壬午太白入昴占曰趙地有兵又曰天下兵起四月乙酉太白晝見是年石季龍殺其子邃又遣將寇沒狄道及屯薊東謀慕容晃三年歲星犯天關安西將軍庾翼與兄冰書

曰歲星犯天關占云關梁當分比來江東無他故江道亦不艱難而石季龍頻年再閉關不通信使此復是天公憤憤無皂白之徵也其閏月乙酉太白犯斗占曰爲喪天下受爵祿九月帝崩太子立大赦賜爵

穆帝永和元年正月丁丑月入畢占曰兵大起戊寅月犯天關占曰有亂臣更天子之法五月辛巳太白晝見在東井占曰爲臣彊秦有兵六月辛丑月入太微犯屏西南星占曰輔臣有免罷者七月八月月皆犯畢占同上巳未月犯輿鬼占曰大臣有誅九月庚戌月宋本月字下多一又字犯畢是年初庾翼在襄陽七月翼疾將終輒以子爰之爲荊州刺史代已任爰之尋被廢明年桓溫又輒率衆伐蜀執李勢送至京都蜀本秦地也

二年二月壬子月犯房上星四月景戌月又犯房上星八月壬申

太白犯左執法

三年正月壬午月犯南斗第五星占曰將軍歿近臣去五月壬申月犯南斗第四星因入魁占曰有兵一曰有大赦六月月犯東井距星占曰將軍死國有憂戊戌月犯五諸侯占曰諸侯有誅九月庚寅太白犯南斗第五星占曰爲喪爲兵

四年七月景申太白犯左執法甲寅月犯房丁巳月入南斗犯第二星乙丑太白犯左執法占悉同上十月甲辰月犯亢占曰兵起將軍死十一月戊戌月犯上將星三年六月大赦是月陳遠征壽春敗而還七月氏蜀餘寇反亂益土九月石季龍伐涼州五年征北大將軍褚裒卒

四年四月太白入昴是時戎晉相侵趙地連兵尤甚七月太白犯軒轅占曰在趙及爲兵喪甲寅月犯房十月甲戌月犯亢占曰兵

起將軍死八月石季龍太子宣殺弟韜宣亦死其十一月戊戌月
犯上將星五年正月石季龍僭號稱皇帝尋死

五年四月丁未太白犯東井占曰秦有兵九月戊戌太白犯左角
占曰爲兵十月月犯昴占曰胡有憂將軍死是年八月褚裒北征
兵敗十月關中二十餘壁舉兵內附石遵攻沒南陽十一月冉閔
殺石遵又盡殺胡十餘萬人於是趙魏大亂十二月褚裒薨八年
劉顯苻健慕容雋並僭號殷浩北伐敗績見廢

六年二月辛酉月犯心大星占曰大人憂又豫州分野也丁丑月
犯房占曰將相憂六月己丑月犯昴占同上乙未月犯五諸侯占
同上七月壬寅月始出西方犯左角占曰大將軍死一曰天下有
兵丁未月犯箕占曰將軍死景寅熒惑犯鉞星占曰大臣有誅八
月辛卯月犯左角太白晝見在南斗月犯右執法占並同上是歲

司徒蔡謨免爲庶人

七年二月太白犯昴占同上三月乙卯熒惑入輿鬼犯積尸占曰
貴人有憂五月乙未熒惑犯軒轅大星占曰女主憂太白入畢口
犯左股占曰將相當之六月乙亥月犯箕占曰國有兵景子月犯
斗丁丑熒惑入太微犯右執法八月庚午太白犯軒轅戊子太白
犯右執法占悉同上七年劉顯殺石祗及諸將帥山東大亂疾疫
灰亡

八年三月戊戌月犯軒轅大星癸丑月入南斗犯第二星五月月
犯心星六月癸酉月犯房七月壬子歲星犯東井距星占曰內亂
兵起八月戊戌熒惑入輿鬼占曰忠臣戮死景辰太白入南斗犯
第四星占曰將爲亂一曰丞相免

九年二月乙巳月入南斗犯第三星三月戊辰月犯房八月歲星

犯輿鬼東南星占曰兵起是時帝幼冲母后稱制將相有隙兵革連起慕容雋僭號稱燕王攻伐不休

十年正月巳卯月蝕昴星占曰趙魏有兵癸酉填星奄鉞星占曰斧鉞用三月甲申月犯心大星占曰王者惡之七月庚午太白晝見晷度推之災在秦鄭九月辛酉太白犯左執法是時桓溫擅命朝臣多見迫脇四月溫伐苻健破其嶢柳軍十二月慕容恪攻齊十一年三月辛亥月奄軒轅占同上四月庚寅月犯牛宿南星占曰國有憂八月巳未太白犯天江占曰河津不通

十二年六月庚子太白晝見在東井占如上巳未月犯鉞星八月癸酉月奄建星九月戊寅熒惑入太微犯西蕃上將星十一月丁丑熒惑犯太微東蕃上將星十二年十一月齊城陷執段龕殺三千餘人永和三年鮮卑侵略河冀升平元年慕容雋遂據臨漳盡

有幽并青冀之地緣河諸將奔散河津隔絕時權在方伯九服交兵

升平元年四月壬子太白入輿鬼丁亥月奄井南轅西頭第二星占曰秦地有兵一曰將死六月戊戌太白晝見在軫占同上軫是楚分野壬子月犯畢占曰爲邊兵七月辛巳熒惑犯天江占曰河津不通十一月歲星犯房占曰豫州有災其年五月苻堅殺苻生而立十二月慕容雋入屯鄴二年八月豫州刺史謝奕薨

二年十二月辛卯填星犯軒轅大星占曰人主惡之甲午月犯東井六月辛酉月犯房十月巳未太白犯哭星占曰有大哭泣三年正月壬辰熒惑犯鍵閉星案占曰人主憂三月乙酉熒惑逆行犯鉤鈴案占王者惡之六月太白犯東井七月乙酉熒惑犯天江景戌太白犯輿鬼占悉同上戊子月犯牽牛中央大星占曰牽牛天

將也犯中央大星將軍死八月丁未太白犯軒轅大星甲子月犯畢大星占曰爲邊兵一曰下犯上三年十月諸葛攸舟軍入河敗績豫州刺史謝萬入朝衆潰而歸萬除名十一月司徒會稽王以郟曇謝萬二鎮敗求自貶三等四年正月慕容雋死子暉代立慕容恪殺其尚書令陽騫等

四年正月乙亥月犯牽牛中央大星六月辛亥辰星犯軒轅占曰女主憂已未太白入太微右掖門從端門出占曰貴奪勢一曰有兵又曰出端門臣不臣八月戊申太白犯氐占曰國有憂景辰熒惑犯太微西蕃上將星九月壬午太白入南斗口犯第四星占曰爲喪有赦天下受爵祿十二月甲寅熒惑犯房景寅太白晝見庚寅月犯楗閉占曰人君惡之

五年正月乙巳填星逆行犯太微五月壬寅月犯太微庚戌月犯

建星占曰大臣相謀是時殷浩敗績卒致遷徙其月辛亥月犯牽牛宿占曰國有憂六月癸亥月犯氐東北星占曰大將當之五年正月北中郎將郟曇薨五月帝崩哀帝立大赦賜爵褚后失勢七月慕容恪攻冀州刺史呂護於野王護奔滎陽是時桓溫以大眾次宛聞護敗乃退

五年六月癸酉月奄氐東北星占曰大將軍當之九月乙酉月奄畢占曰有邊兵十月丁未月犯畢大星占曰下犯上又曰有邊兵八月范汪廢隆和元年慕容暉遣將寇河陰

哀帝興寧三年七月庚戌月犯南斗占曰女王憂歲星犯輿鬼占曰人君憂十月太白晝見在亢占曰亢爲朝廷有兵喪爲臣彊明年五月皇后庾氏崩

海西太和二年正月太白入昴五年慕容暉爲苻堅所滅又據司

冀幽并四州

六年閏月熒惑守太微端門占曰天子亡國又曰諸侯三公謀其上
上一日有斬臣辛卯月犯心大星占曰王者惡之十一月桓溫廢
帝并奏誅武陵王簡文不許溫乃徙之新安皆臣彊之應也
簡文咸安元年十二月辛卯熒惑逆行入太微二年三月猶不退
占曰國不安有憂是時帝有桓溫之逼

二年五月丁未太白犯天關占曰起兵歲星形色如太白占曰進
退如度姦邪息變色亂行主無福歲星於仲夏當細小而不明此
其失常也又為臣彊六月太白晝見在七星乙酉太白犯輿鬼占
曰國有憂七月帝崩桓溫以兵威擅權將誅王坦之等內外迫脅
又庾希入京城盧悚入宮並誅滅之

孝武寧康元年正月戊申月奄心大星案占曰災不在王者則在
豫州一日王命惡之三月景午月奄南斗第五星占曰大臣有憂
死亡一日將軍死七月桓溫薨九月癸巳熒惑入太微是時女主
臨朝政事多缺

二年閏月巳未月奄牽牛南星占曰左將軍死十二月甲申太白
晝見在氏氏兗州分野三年五月景午北中郎將王坦之薨三年
六月辛卯太白犯東井占曰秦地有兵九月戊申熒惑奄左執法
占曰執法者死太元元年苻堅破涼州二年十月尚書令王彪之
卒

太元元年四月景戌熒惑犯南斗第三星景申又奄第四星占曰
兵大起中國饑一日有赦八月癸酉太白晝見在氏氏兗州分野
九月熒惑犯哭泣星遂入羽林占曰天子有哭泣事中軍兵起十
一月巳未月奄氏角占曰天下有兵一日國有憂

二年二月熒惑守羽林占曰禁兵大起九月壬午太白晝見在角
角兗州分野升平元年五月大赦三年八月秦人寇樊鄧襄陽彭
城四年二月襄陽陷朱序沒四月魏興陷賊聚廣陵三河衆五六
萬於是諸軍外次衝要丹陽尹屯衛京都六月兗州刺史謝玄討
賊大破之是時中外連兵比年荒儉

四年十一月丁巳太白犯哭星占曰天子有哭泣事

五年七月景子辰星犯軒轅占曰女主當之九月癸未皇后王氏
崩

六年九月景子太白晝見

七年十一月太白又晝見在斗占曰吳有兵喪

八年四月甲子太白又晝見在參占曰魏有兵喪是月桓沖征沔
漢陽亮伐蜀並拔城略地八月苻堅自將號百萬九月攻沒壽陽

十月劉牢之破苻堅將梁成斬之殺獲萬餘人謝玄等又破苻堅
於淝水斬其弟融堅大衆奔潰九年六月白太后褚氏崩八月謝
玄出屯彭城經略中州矣

九年七月景戌太白晝見十一月丁巳又晝見

十年四月乙亥又晝見于畢昴占曰魏國有兵喪是時苻堅大衆
奔潰趙魏兵連相攻堅爲姚萇所殺

十一年三月戊申太白晝見在東井占曰秦有兵臣彊六月甲申
又晝見于輿鬼占曰秦有兵時魏姚萇苻登連兵相征不息甲午
歲星晝見在胃占曰魯有兵臣彊十二年慕容垂寇東阿翟遼寇
河上姚萇假號安定苻登自立隴上呂光竊據涼土

十二年六月癸卯太白晝見在柳十月庚午太白晝見在斗

十三年正月景戌又晝見十二月熒惑在角亢形色猛盛占曰熒

惑失其常吏且棄其法諸侯亂其政自是後慕容垂翟遼姚萇苻登慕容永並阻兵爭疆十四年正月彭城妖賊又稱號於皇丘劉牢之破滅之三月張道破合鄉圍泰山向欽之擊走之是年翟遼又攻沒滎陽侵略陳項于時政事多弊君道陵遲矣

十四年四月乙巳太白晝見于柳六月辛卯又晝見于翼九月景寅又晝見于軫十二月熒惑入羽林占並同上十五年翟遼掠司兗衆軍累討不尅慕容垂又跨略并冀等州七月旱八月諸郡大水兗州又蝗

十五年九月癸未熒惑入太微十月太白入羽林

十六年四月癸卯朔太白晝見十一月癸巳月奄心前星占曰太子憂是時太子常有篤疾

十七年七月丁丑太白晝見十月丁酉又晝見

十八年六月又晝見

十九年五月又晝見于柳六月辛酉又晝見于輿鬼九月又見于軫

二十年六月熒惑入天囷占曰大飢七月丁亥太白晝見在太微占曰太白入太微國有憂晝見爲兵喪十二月己巳月犯鍵閉及東西咸占曰鍵閉司心腹喉舌東西咸主陰謀

二十一年二月壬申太白晝見三月癸卯太白連晝見在羽林占曰有疆臣有兵喪中軍兵起三月太白晝見于胃占曰中軍兵起四月壬午太白入天囷占曰爲飢六月歲星犯哭泣星占曰有哭泣事是年九月帝崩隆安元年王恭等舉兵脇朝廷於是內外戒嚴殺王國寶以謝之又一作及連歲水旱三方動衆人饑

安帝隆安元年正月癸亥熒惑犯哭泣星占曰有哭泣事四月丁

丑太白晝見在東井占曰秦有兵喪六月姚興攻洛陽郗恢遣兵救之冬姚萇死子略代立魏王圭卽位於中山其八月熒惑守井鉞占曰大臣有誅

二年六月戊辰攝提移度失常歲星晝見在胃兗州分野是年六月郗恢遣鄧啟方等以萬人伐慕容寶於滑臺敗而還閏月太白晝見在羽林十一月犯東上相

三年五月辛酉月又奄東上相辛未辰星犯軒轅大星占悉同上二年九月庾楷等舉兵表誅王愉等於是內外戒嚴三年六月洛陽沒于寇桓玄破荆雍州殺殷仲堪等孫恩聚衆攻沒會稽殺內史

四年六月辛酉月犯哭泣星

五年正月太白晝見自去年十二月在斗晝見至于是月乙卯案

占災在吳越七月癸亥大角星散搖五色占曰王者流散丁卯月犯天關占曰王者憂九月庚子熒惑犯少微又守之占曰處士誅十月甲子月犯東次相其年七月太皇太后李氏崩十月妖賊大破高雅之於餘姚死者十七八五年孫恩攻侵郡縣殺內史至京口進軍蒲洲於是內外戒嚴恩遣別將攻廣陵殺三千餘人退據郁洲是時劉裕又追破之九月桓玄表至逆旨陵上十月司馬元顯大治水軍將以伐玄元興元年正月盧循自稱征虜將軍領孫恩餘衆略有永嘉晉安之地二月帝戎服遣西軍三月桓玄尅京都殺司馬元顯放太傅會稽王道子元興元年三月戊子太白犯五諸侯因晝見占曰諸侯有誅七月戊寅熒惑在東井熒惑犯輿鬼積尸占並同上八月景寅太白奄右執法九月癸未太白犯進賢占曰進賢者誅

三年二月歲星犯西上將六月甲辰月奄斗第四星占曰大臣誅
不出三年八月癸丑太白犯房北第二星九月巳丑歲星犯進賢
熒惑犯西上將十月甲戌太白犯泣星十一月丁酉熒惑犯東上
相十二月乙巳月奄軒轅第二星占悉同上升平元年冬魏破姚
興軍二年十二月桓玄篡位放遷帝后於尋陽以永安何皇后爲
零陵君三年二月劉裕盡誅桓氏

三年正月戊戌熒惑逆行犯太微西上相占曰天子戰於野上相
死二月景辰熒惑逆行在左執法西北占曰執法者誅四月甲午
月奄軒轅第二星五月壬申月奄斗第二星填星入羽林占並同
上是年二月景辰劉裕殺桓修等三月巳未破走桓玄遣軍西討
辛巳誅左僕射王愉桓玄劫天子如江陵五月亥下至崢嶸洲義
軍破滅之桓振又攻沒江陵幽劫天子七月永安何皇后崩

義熙元年三月壬辰月奄左執法占同上丁酉月奄心前星占曰
豫州有災太白犯東井占曰秦有兵七月庚辰太白晝見在翼軫
占曰爲臣彊荆州有兵喪八月丁巳犯斗第一星占曰天下有兵
一曰大臣憂九月甲子熒惑犯少微占曰處士誅庚寅熒惑犯右
執法癸卯熒惑犯左執法占並同上十一月景戌太白犯鉤鈴占
曰喉舌憂十二月巳卯歲星犯天關占曰有兵亂河津不通十一
月荆州刺史魏詠之薨二年二月司馬國璠等攻沒戈陽四月姚
興伐仇池公楊盛擊走之九月益州刺史司馬榮期爲其參軍楊
承祖所害三年十二月司徒揚州刺史王謐薨四年正月太保武
陵王遵薨三月左僕射孔安國卒自後政在劉裕人主端拱而已
二年二月太白犯南斗占曰兵起巳丑月犯心後星占曰豫州有
災四月癸丑月犯太微西上將巳未月犯房南第二星乙丑歲星

犯天江占曰有兵亂河津不通五月癸未月犯左角占曰左將軍死天下有兵壬寅熒惑犯氏占曰氏爲宿宮人主憂六月庚午熒惑犯房北第二星八月癸亥熒惑犯南斗第五星丁巳犯建星占曰爲兵九月壬午熒惑犯哭星又犯泣星是年二月甲戌司馬國璠等攻沒弋陽又慕容超侵略徐兗三年正月又寇北徐州至下邳十二月司徒王謐薨四年正月武陵王遵薨五年慕容超復寇淮北四月劉裕大軍討之拔臨朐又圍廣固拔之

三年正月景子太白晝見在奎二月庚申月奄心後星占同上五月癸未月犯左角己丑太白晝見在參占曰益州有兵喪臣彊八月己卯太白犯左執法辛卯熒惑犯左執法九月壬子熒惑犯進賢星是年八月劉敬宣伐蜀不尅而旋四年三月左僕射孔安國卒七月司馬叔璠等攻沒鄒山魯郡太守徐邕破走之姚略遣衆

征赫連勃勃大爲所破五年劉裕討慕容超滅之

四年正月庚子熒惑犯天關五月丁未月奄斗第二星壬子填星犯天廩占曰天下飢倉粟少六月己丑太白犯太微西上將乙卯又犯左執法十月戊子熒惑入羽林占悉同上五年劉裕討慕容超後南北軍旅運轉不息

五年二月甲子月犯昴占曰胡不安天子破匈奴五月戊戌歲星入羽林九月壬寅月犯昴十月熒惑犯氏閏月丁酉月犯昴辛亥熒惑犯鉤鈴己巳月奄心大星占曰王者惡之是年四月劉裕討慕容超十月魏王圭遇弒殂六年五月盧循逼郊甸宮衛被甲

六年三月丁卯月奄房南第二星災在次相己巳又奄斗第五星占曰斗主吳吳地兵起太白犯五諸侯占曰諸侯有誅五月甲子月奄斗第五星己亥月奄昴第三星占曰國有憂一曰有白衣之

會六月巳丑月犯房南第二星甲午太白晝見七月巳亥月犯輿
鬼占曰國有憂一曰秦有兵八月壬午太白犯軒轅大星甲申月
犯心前星災在豫州景戌月犯斗第五星占同上丁亥月奄牛宿
南星占曰天下有大誅乙未太白犯太微景午太白在少微而晝
見九月甲寅太白犯左執法丁丑填星犯畢占曰有邊兵是年三
月始興太守徐道覆反四月盧循寇湘中沒巴陵率眾逼京畿是
月左僕射孟昶懼王威不振仰藥自殺七年十二月劉蕃梟徐道
覆首杜慧度斬盧循並傳首京都八年六月劉道規卒時爲豫州
刺史八月皇后王氏崩九月兗州刺史劉蕃尚書左僕射謝混伏
誅劉裕西討劉毅斬首徇之十二月遣益州刺史朱齡石伐蜀
七年四月辛丑熒惑入輿鬼占曰秦有兵一曰雍州有災六月太
白晝見在翼巳亥填星犯天關占曰臣謀王八月太白犯房南第

二星十一月景子太白犯哭星其七月朱齡石尅蜀蜀又反討滅
之

八年七月癸亥月奄房北第二星巳未月犯井鉞八月戊申月犯
泣星十月辛亥月奄天關占曰有兵十一月丁丑填星犯東井占
曰大人憂十二月癸卯填星犯井鉞是年八月皇后王氏崩九年
誅劉蕃謝混討滅劉毅十二月朱齡石滅蜀

九年二月熒惑入輿鬼占曰有兵喪太白犯南河占曰兵起五月
壬辰太白犯右執法晝見七月庚午月奄鉤鈴占曰喉舌臣憂九
月庚午歲星犯軒轅大星巳丑月犯左角時劉裕擅命兵革不休
十年裕討司馬休之王師不利休之等奔長安

十年正月丁卯月犯畢占曰將相有以家坐罪者二月巳酉月犯
房北星五月壬寅月犯牽牛南星乙丑歲星犯軒轅大星占悉同

上六月景申月奄氐占曰將死之國有誅者七月庚辰月犯天關
占曰兵起熒惑犯井鉞填星犯輿鬼遂守之占曰大人憂宗廟改
八月丁酉月奄牽牛南星占同上九月填星犯輿鬼占曰人主憂
丁巳太白入羽林十二月巳酉月犯西咸占曰有陰謀十一年林
邑寇交州距敗之

十一年三月丁巳月入畢占曰天下兵起一曰有邊兵巳卯熒惑
入輿鬼閏月景午填星又入輿鬼占曰爲旱大疫爲亂臣五月癸
卯熒惑入太微甲辰犯右執法六月巳未太白犯東井占曰秦有
兵戊寅犯輿鬼占曰國有憂七月辛丑月犯畢占同上八月壬子
月犯氐占同上庚申太白順行從右掖門入太微丁卯奄左執法
十一月癸亥月入畢占同上乙未月入輿鬼而暈

十二年五月甲申歲星留房心之間宋之分野始封劉裕爲宋公

六月壬子太白順行入太微右掖門巳巳月犯畢占同上七月月
犯牛宿十月景戌月入畢

十三年五月景子月犯軒轅丁亥犯牽牛癸巳熒惑犯右執法八
月巳酉月犯牽牛丁卯月犯太微占曰人君憂九月壬辰熒惑犯
軒轅十月戊申月犯畢占悉同上月犯箕占曰國有憂甲寅月犯
畢占同上乙卯填星犯太微留積七十餘日占曰亡君之戒壬戌
月犯太微

十四年三月癸巳太白犯五諸侯五月庚子月犯太微七月甲辰
熒惑犯輿鬼占曰秦有兵又爲旱爲兵喪亦曰大人憂宗廟改亦
爲亂臣時劉裕擅命軍旅數興饑旱相屬其後卒移晉室丁巳月
犯東井占曰軍將死八月甲子太白犯軒轅癸酉填星入太微犯
右執法因留太微中積二百餘日乃去占曰填星守太微亡君之

戒有徙王九月乙未太白入太微犯左執法丁巳入太微占曰大人憂十月甲申月入太微癸巳熒惑入太微犯西蕃上將仍順行至左掖門內留二十日乃逆行義熙十二年七月劉裕伐姚泓十三年八月擒姚泓司寇秦雍悉平十四年劉裕還彭城受宋公十一月左僕射前將軍劉穆之卒明年西虜寇長安雍州刺史朱齡石諸軍陷沒官軍捨而東十二月帝崩

恭帝元熙元年正月景午三月壬寅五月景申月皆犯太微占悉同上乙卯辰星犯軒轅六月庚辰太白犯太微七月巳卯月犯太微太白晝見自義熙元年至是太白經天者九月蝕者四皆從上始革代更王臣失君之象也是夜太白犯熒星十二月丁巳月入太白俱入羽林

二年三月庚午填星犯大微占悉同上元年七月劉裕受宗王是年六月帝遜位于宋

妖星客星

魏文帝黃初三年九月甲辰客星見太微左掖門內占曰客星出太微國有兵喪十月帝南征孫權是後累有征役

六年十月乙未有星孛于少微歷軒轅占爲兵喪除舊布新之象時帝軍廣陵辛丑親御甲冑觀兵明年五月帝崩

明帝太和六年十一月景寅有星孛于翼近太微上將星占曰爲兵喪甘氏曰孛彗所當之國是受其殃翼又楚分野孫權封略也明年權有遼東之敗又明年諸葛亮入秦川孫權發兵緣江淮屯要衝權自圍新城以應亮天子東征權

青龍四年十月甲申有星孛于大辰長三尺乙酉又孛于東方十一月巳亥彗星見犯宦者天紀星占曰大辰爲天王天下有喪劉

向五紀論曰春秋星孛于東方不言宿者不加宿也宦者在天市
為中外有兵天紀為地震孛彗主兵喪

景初元年六月地震九月吳將朱然圍江夏皇后毛氏崩二年正
月討公孫文懿三年正月明帝崩

景初二年八月彗星見張長三尺逆西行四十一日滅占同上張
周分野十月癸巳客星見危逆行在離宮北騰蛇南甲辰犯宗星
巳酉滅占曰客兵所出有兵喪虛危為宗廟又為墳墓客星近離
宮則宮中將有大喪就先君於宗廟之象也三年正月帝崩

少帝正始元年十月乙酉彗星見西方在尾長二丈拂牽牛犯太
白十一月甲子進犯羽林占曰尾為燕又為吳牛亦吳越之分太
白為上將羽林中軍兵為吳越有喪中軍兵動二年五月吳遣三
將寇邊吳太子登卒六月宣帝討諸葛恪於皖太尉滿寵薨

六年八月戊午彗星見七星長二尺色白進至張積二十三日滅
七年十一月癸亥又見軫長一尺積百五十六日滅九年三月又
見昴長六尺色青白芒西南指七月又見翼長二尺進至軫積四
十二日滅案占曰七星張為周分野翼軫為楚昴為趙魏彗所以
除舊布新主兵喪也嘉平元年宣帝誅曹爽兄弟及其黨與皆夷
三族京師嚴兵三年誅楚王彪又襲王凌於淮南淮南東楚也魏
諸王幽於鄴

嘉平三年十一月癸亥有星孛于營室西行積九十日滅占曰有
兵喪室為後宮後宮且有亂

四年二月丁酉彗星見西方在胃長五六丈色白芒南指貫參積
二十日滅

五年十一月彗星又見軫長五丈在太微左執法西東南指積百

九十日滅案占胃兖州之分野參主兵太微天子庭執法爲執政
李彗爲兵喪除舊布新之象正元元年二月李豐豐弟翼后父張
緝等謀亂皆誅皇后亦廢九月廢帝爲齊王

高貴鄉公正元元年十一月白氣出南斗側廣數丈長竟天王肅
曰蚩尤之旗也東南其有亂乎二年正月有彗星見於吳越分西
北竟天鎮東大將軍母丘儉等據淮南叛景帝討平之案占蚩尤
旗見王者征伐四方自後又征淮南西平巴蜀是歲吳王孫亮五
鳳元年也斗牛吳越分案占吳有兵喪除舊布新之象也太平三
年孫綝盛兵圍宮廢亮爲會稽王故國志又書於吳也淮南江東
同揚州地故于時變見吳楚楚之分則魏之淮南多與吳同災是
以母丘儉以彗爲已應遂起兵而敗後三年卽魏甘露二年諸葛
誕又反淮南吳遣將救之及城陷誕衆與吳兵死沒各數萬人猶

前長星之應也

甘露二年十一月彗星見角色白占曰彗星見兩角間色白者軍
起不戰邦有大喪景元元年高貴鄉公爲成濟所害

四年十月丁丑客星見太微中轉東南行歷軫宿積七日滅占曰
客星出太微有兵喪景元元年高貴鄉公被害

元帝景元三年十一月壬寅彗星見亢色白長五寸轉北行積四
十五日滅占曰爲兵喪一曰彗星見亢天子失德四年鍾會鄧艾
伐蜀尅之二將反亂皆誅

咸熙二年五月彗星見王良長丈餘色白東南指積十二日滅占
曰王良天子御駟彗星埽之禪代之表除舊布新之象也白色爲
喪王良在東壁宿又并州之分野八月文帝崩十二月武帝受魏

禪

武帝泰始四年正月景戌彗星見軫青白色西北行又轉東行占曰爲兵喪軫又楚分野三月皇太后王氏崩十月吳寇江夏襄陽五年九月星孛于紫宮占如上紫宮天子內宮十年武元楊皇后崩十年十二月有星孛于軫占曰天下兵起軫又楚分野咸寧二年六月甲戌星孛于氐占曰天子失德易政氐又兗州分七月星孛大角大角爲帝坐八月星孛太微至翼北斗三台占曰太微天子庭大人惡之一曰有改王翼又楚分野北斗主殺罰三台爲三公

三年正月星孛于西方三月星孛于胃胃徐州分四月星孛女御女御爲後宮五月又孛于東方七月星孛紫宮占曰天下易王四年四月蚩尤旗見于東井後年傾三方伐吳是其應也五年三月星孛于柳四月又孛于女御七月孛于紫宮占曰外臣

陵主柳又三河分野大角太微紫宮女御並爲王者明年吳亡是其應也孛主兵喪征吳之役三河徐兗之兵悉出交戰於吳楚之地吳丞相都督以下梟戮十數偏裨行陣之徒馘斬萬計皆其徵也

太康二年八月有星孛于張占曰爲兵喪十一月星孛于軒轅占曰後宮當之

四年三月戊申星孛于西南是年齊王攸任城王陵琅邪王佃新都王詠薨

八年九月星孛于南斗長數十丈十餘日滅占曰斗主爵祿國有大憂一曰孛于斗王者疾病天下易政大亂兵起

太熙元年四月客星在紫宮占曰爲兵喪太康末武帝耽宴遊多疾病是月巳酉帝崩永平元年賈后誅楊駿及其黨與皆夷三族

楊太后亦見弑又誅汝南王亮太保衛瓘楚王瑋王室兵喪之應也

惠帝元康五年四月有星孛于奎至軒轅太微經三台大陵占曰奎爲魯又爲庫兵軒轅爲後宮太微天子庭三台爲三司太陵有積尸死喪之事其後武庫火西羌反後五年司空張華遇禍賈后廢死魯公賈謐誅又明年趙王倫篡位於是三王興兵討倫兵士戰死十餘萬人

永康元年三月妖星見南方占曰妖星出天下大兵將起是月賈后殺太子趙王倫尋廢殺后斬司空張華又廢帝自立於是三王並起迭總天權其十二月彗星出牽牛之西指天市占曰牛者七政始彗出之改元易號之象也天市一名天府一名天子旗帝坐在其中明年趙王倫篡位改元尋爲大兵所滅

二年四月彗星見齊分占曰齊有兵喪是時齊王冏起兵討趙王倫倫滅冏擁兵不朝專權淫奢明年誅死

太安元年四月彗星晝見

二年三月彗星見東方指三台占曰兵喪之象三台爲三公三年正月東海王越執太尉長沙王又張方又殺之

永興元年五月客星守畢占曰天子絕嗣一曰大臣有誅時諸王擁兵其後惠帝失統終無繼嗣

二年八月有星孛于昴畢占曰爲兵喪昴畢又趙魏分野十月丁丑有星孛于北斗占曰璇璣更授天子出走又曰彊國發兵諸侯爭權是後諸王交兵皆有應明年惠帝崩

成帝咸和四年七月有星孛于西北犯斗二十三日滅占曰爲兵亂十二月郭默殺江州刺史劉胤荊州刺史陶侃討默斬之時石

勒又始僭號

咸康二年正月辛巳彗星夕見西方在奎占曰爲兵喪奎又爲邊兵三年正月石季龍僭天王位四年石季龍伐慕容皝不尅既退皝追擊之又破麻秋時皝稱蕃邊兵之應也

六年二月庚辰有星孛于太微七年三月杜皇后崩

康帝建元元年十一月六日彗星見亢長七尺白色占曰亢爲朝廷主兵喪二年康帝崩

穆帝永和五年十一月乙卯彗星見于亢芒西向色白長一丈六年正月丁丑彗星又見于亢占曰爲兵喪疾疫其五年八月褚裒北征兵敗十一月冉閔殺石遵又盡殺胡十餘萬人於是中土大亂十二月褚裒薨是年大疫

升平二年五月丁亥彗星出天船在胃占曰爲兵喪除舊布新出

天船外夷侵一曰爲大水四年五月天下大水五年穆帝崩

哀帝興寧元年八月有星孛于角亢入天市案占曰爲兵喪三年

正月皇后王氏崩二月帝崩三月慕容恪攻沒洛陽沈勁等戰死

海西太和四年二月客星見紫宮西垣至七月乃滅占曰客星守

紫宮臣弒王六年桓溫廢帝爲海西公

季武寧康二年正月丁巳有星孛于女虛經氏角亢一作亢角軫翼張至

三月景戌彗星見於氏九月丁丑有星孛于天市占曰爲兵喪太

元元年七月符堅破涼州虜張天錫

太元十一年三月客星在南斗至六月乃沒占曰有兵有赦是後

司雍兗冀常有兵役十二年正月大赦八月又大赦

十五年七月壬申有星孛于北河或經太微三台文昌入北斗色

白長十餘丈八月戊戌入紫宮一作微乃滅占曰北河或一名胡門胡

門有兵喪埽太微入紫微王者當之三台為三公文昌為將相將相三公有災入北斗諸侯戮一曰埽北斗彊國發兵諸侯爭權大人憂二十一年帝崩隆安元年王恭殷仲堪桓玄等並發兵表以誅王國寶為名朝廷順而殺之并斬其從弟緒司馬道子由是失勢禍亂成矣

十八年二月客星在星中至九月乃滅占曰燕有兵喪二十年慕容垂息寶伐魏為所破死者數萬人二十一年垂死國遂衰亡

二十年九月有蓬星如粉絮東南行南行一作行南歷女虛至哭星占曰蓬

星見不出三年必有亂臣戮死於市是時王國寶交構朝廷二十一年九月帝崩隆安元年王恭等興兵而朝廷殺王國寶王緒

安帝隆安四年二月己丑有星孛奎長三丈上至閣道紫宮西蕃入北斗魁至三台三月遂經于太微帝坐端門占曰彗星埽天子

庭閣道易王之象經三台入北斗占同上條十二月戊寅有星孛于貫孛天市天津占曰貴臣獄死內外有兵喪天津為賊斷王道天下不通案占災在吳越五年二月有孫恩兵亂攻侵郡國於是內外戒嚴營陣屯守柵斷淮口九月桓玄表至逆旨陵上其後玄遂篡位亂京都大饑人相食百姓流亡皆其應也

元興元年十月有客星色白如粉絮在太微西至十二月入太微占曰兵入天子庭二年十二月桓玄篡位放遷帝后於尋陽以永安何皇后為零陵君三年二月劉裕盡誅桓氏

義熙十一年五月甲申彗星二出天市埽帝坐在房心北房心宋之分野案占得彗柄者興除舊布新宋興之象

十四年五月庚子有星孛于北斗魁中七月癸亥彗星出太微西柄起上相星下芒漸長至十餘丈進埽北斗紫微中台占曰彗出

太微社稷亡天下易王入北斗紫微帝宮空十四年劉裕還彭城受宋公十二月帝崩

恭帝元年正月戊戌有星孛于太微西蕃占曰革命之徵其年宋有天下

星流隕

蜀後王建興十三年諸葛亮帥大衆伐魏屯于渭南有長星赤而芒角自東北西南流投亮營三投再還往大還小占曰兩軍相當有大流星來走軍上及墜軍中者皆破敗之徵也九月亮卒于軍焚營而退群帥交怨多相誅殘

魏明帝景初二年宣帝圍公孫文懿於襄平八月景寅夜有大流星長數十丈白色有芒鬣從首山東北流墜襄平城東南占曰圍城而有流星來走城上及墜城中者破又曰星墜當其下有戰場

又曰凡星所墜國易姓九月文懿突圍走至星墜所被斬屠城坑其衆

元帝景元四年六月有大流星二並如斗見西方分流南北光照地隆隆有聲案占流星爲貴使星大者使大是年鍾鄧尅蜀二星蓋二帥之象二帥相背又分流南北之應鍾會旣叛三軍憤怒隆隆有聲兵將怒之徵也

武帝泰始四年七月星隕如雨皆西流占曰星隕爲百姓叛西流吳人歸晉之象也二年吳夏口督孫秀率部曲二千餘人來降太康九年八月壬子星隕如雨劉向傳云下去其上之象後三年帝崩而惠帝立天下自此亂矣

惠帝元康四年九月甲午枉矢東北行竟天

六年六月景午夜有枉矢自斗魁東南行案占曰以亂伐亂北斗

主執殺出斗魁居中執殺者不直之象也是後趙王殺張裴廢賈后以理太子之寃因自篡盜以至屠滅以亂伐亂之應也一曰氏帥齊萬年反之應也

太安二年十一月辛巳有星晝隕中天北下光變白有聲如雷案占名曰營首營首所在下有兵流血明年劉元海石勒攻略并州多所殘滅王浚起燕代引鮮卑攻掠鄴中百姓塗地有聲如雷怒之象也

永興元年七月乙丑星隕有聲

二年十月星又隕有聲占同上是後遂亡中夏

光熙元年五月枉矢西南流是時司馬越西破河間兵奉迎大駕尋收繆胤何綏等肆無君之心天下惡之及死而石勒焚其屍柩是其應也

懷帝永嘉元年九月辛卯有大星如日自西南流于東北小者如斗相隨天盡赤聲如雷占曰流星爲貴使星大者使大是年五月汲桑殺東燕王騰遂據河北十一月始遣和郁爲征北將軍鎮鄴西田甄等大破汲桑斬于樂陵於是以甄爲汲郡太守弟蘭鉅鹿太守小星相隨者小將別帥之象也司馬越忿魏郡以東平原以南皆黨於桑以賞甄等於是侵掠桑地有聲如雷忿怒之象也四年十月庚子大星西北墜有聲尋而帝蒙塵于平陽

元帝太興三年四月壬辰枉矢出虛危沒翼軫占曰枉矢所觸天下之所伐翼軫荊州之分野太寧二年王敦殺譙王承及甘卓而敦又梟夷枉矢觸翼之應也

永昌元年七月甲午有流星大如瓮長百餘丈青赤色從西方來尾分爲百餘岐或散時王敦之亂百姓流亡之應也

成帝咸康三年六月辛未流星大如二斗魁色青赤光耀地出奎中没婁北案占爲饑五穀不藏是月大旱饑

六年二月庚午朔有流星大如斗光耀地出天市西行入太微占曰大人當之八年六月成帝崩

穆帝永和八年六月辛巳日未入有流星大如三斗魁從辰巳上東南行晷度推之在箕斗之間蓋燕分也案占爲營首營首之下流血滂沱是時慕容雋僭稱大燕攻伐無已

十年四月癸未流星大如斗色赤黃出織女没造父有聲如雷占曰燕齊有兵百姓流亡其年十二月慕容雋遂據臨漳盡有幽并青冀之地緣河諸將奔散河津隔絕慕容恪攻齊

升平二年十一月枉矢自東南流于西北其長半天四年十月庚戌天狗見西南占曰有大兵流血

海西太和四年十月壬申有大流星西下有聲如雷明年遣使免表真爲庶人桓溫征壽春真病死息瑾代立求救於苻堅溫破苻堅軍六月壽春城陷

孝武太元六年十月乙卯有奔星東南經翼軫聲如雷占曰楚地有兵軍破百姓流亡十二月苻堅荊州刺史梁成襄陽太守閻震率衆伐竟陵桓石虔擊大破之生擒震斬首七千獲生口萬人聲如雷將帥怒之象也

十三年閏月戊辰天狗東北下有聲占曰有大戰流血自是後慕容垂翟遼姚萇苻登慕容永並阻兵爭疆十四年正月彭城妖賊又稱僞號於皇丘劉牢之破滅之三月張道破合鄉太山向欽之擊走之

安帝隆安五年三月甲寅流星赤色衆多西行經牽牛虛危天津

閣道貫太微紫宮占曰星庶人類衆多西行衆將西流之象經天子庭主弱臣彊諸侯兵不制其年五月孫恩侵吳郡殺內史六月至京口於是內外戒嚴營陣屯守劉裕追破之元興元年七月大飢人相食浙江以東流亡十六七吳郡吳興戶口減半又流奔而西者萬計十月桓玄遣將擊劉軌破走之軌奔青州雲氣

惠帝永興元年十二月壬寅夜有赤氣亘天砰隱有聲

二年十月丁丑赤氣見北方東西竟天占曰並爲大兵砰隱有聲怒之象也是後四海雲擾九服交兵

光熙元年十二月甲申有白氣若虹中天北下至地夜見五日乃滅占曰大兵起明年王彌起青徐汲桑亂河北毒流天下

懷帝永嘉三年十二月乙亥有白氣如帶出南北方各二起地至

天貫參伐中占曰天下大兵起四年三月司馬越收繆胤等又三方雲擾攻戰不休五年三月司馬越死於寧平城石勒攻破其衆死者十餘萬人六月京都焚滅帝如虜庭

愍帝建興元年十月己巳夜有赤氣曜於西北荊州刺史陶侃討杜弢之黨於石城戰敗

晉書十三 志第三 終

天
運
中
國
印

漢書
正本

三

